

يوميات أم

طالع

حبابي عينيها

ريم مراد

# يوميات أم طالع حبابي عينيها

مقالات

تأليف :

**ريم مراد**

تصميم الغلاف:

**كريم أدم**

مراجعة لغوية:

**ابراهيم سالم**



رقم الإيداع: 2013\5921

التسجيل الدولي: 978-977-90-0479-2

إشراف عام:

**محمد جميل صبري**

**نيفين التهامي**

\*\*\*

## كيان للنشر والتوزيع

٢٢ ش الشهيد الحي بجوار مترو ضواحي الجيزة - الهرم

هاتف أرضي: 0235688678 - 0235611772

هاتف محمول: 01005248794-01000405450-01001872290

بريد إلكتروني: info@kayanpublishing.com - kayanpub@gmail.com

الموقع الرسمي : www.kayanpublishing.com

© جميع الحقوق محفوظة، وأي اقتباس أو إعادة طبع أو نشر في أي صورة كانت ورقية أو إلكترونية أو بآية وسيلة سمعية أو بصرية دون إذن كتابي من الناشر، يعرض صاحبه للمساءلة القانونية.

يوميات أم  
طالع  
حبابي عينيها

ريم مراد



## قبل الإهداء والذي منه

أعزائي القراء ستتعجبون من هذا الكم من الإهداءات التي ستقرأونها بعد قليل ولكن بما إن بفضل الله , كان لي الكثيرون ممن الذين أثروا في طفلة عمري وساندوني وكانوا موجودين من أجلي في كل وقت وجدت إنه ليس من العدل ألا أذكرهم في إهداءات.

ولذا تحملوا معي هذا الكم من الإهداءات ...

ريم مراد



## إهداء صغوووووون

إلى ورداتي الثلاثة .. فاطمة وعالية وسلي , أهديكن هذه اليوميات التي  
شاركتموني كتابتها , فكل سطر وموقف استوحيته من حياتي معكن يا  
أجمل ما في حياتي .. حفظكن الله لي وبارك لي فيكن ..  
أحبكن أكثر من الحياة نفسها ...

ريم

أمكم اللى طلعتوا حبابي عينمها بس على قلبها زى العسل



## إهداء كبير أووووووى

إلى أبى «سعيد مراد» لا اجد كلمات كافية لاصف بها مداً القوة التى  
أمدتنى بها وانا أقوم بتجهيز كتابى هذا , كنت دوماً خير معين وصديق  
وسند لأسرتنا الصغيرة ... أحبك  
إلى أمى « منى » التى احتوتنا تحت جناحها بأجمل مشاعر الحب والأمان  
والحنان, أحبك بمقدار الحب ولاهتمام الذى أعطيته لنا منذ طفولتنا  
حتى اليوم . . .



## إهداء خاص جداً

إلى أمى الثانية وخالتى الحبيبة «شهيره» وزوجها « علوى » اللذان لم  
يبخلا علينا أنا واختى بحبهما ووقتتهما واهتمامهما ....  
إلى زوجى حاتم ... شكراً لقد أهديتنى أجمل ما فى حياتى : ورداتى الثلاثة  
إلى أختى الصغيره «رشا» كنت ولا تزالى نصفى الثانى وصديقتى وصندوقى  
الأسود ....  
إلى خالى «حازم» كنت أول صديق وناصح لى منذ وعيت على الدنيا ...

**حفظكم الله لى جميعكم ولا يحرمنى من  
حبكم وحنانكم واهتمامكم ...**







## إهداء جديد لانج للطبعة الجديدة

لكل من قرأ كتابي ، لكل من أثلج صدري بكلمات جميلة بخصوص هذه  
اليوميات، لكل من أعطاني تشجيعهم دفعة للأمام، لكل من شاركني  
فرحتي بنجاح الكتاب وطبعاته المتتالية ، أشكركم جميعا واهديكم  
الطبعة الجديدة من كتابي ....

ريم



## من طأطأ ..... لسلاموا عليكو

سابداً معكم قصة هذ الكتاب . من قبل طأطأ حتى . من زمان أوى . منذ كنت طفلة في الثانية عشر وكتبت أولى قصصى القصيرة . كنا في الإسكندرية حيث نقضى الإجازة الصيفية مع جدى وجدتى في منزلنا في رشدى . يومها نزلت ككل يوم للبقالة الصغيرة التى أمامنا مع أختى لنشتري حلوياتنا المفضلة , ولكن ف هذا اليوم أشرتيت بدلا من حلوياتى , كراسة بغلاف جميل ملون وأقلام , ووضعتم أمامى وجلست , لم أعرف لماذا ضحيت بحلوياتى من أجل هذه الكراسة ؟ ماذا ترانى فاعلة بها ؟ هل سأرسم ؟ هل سأكتب ؟ هل سأنقل الكلمات الفرنسية الجديدة التى استخرجتها من القصة التى أهدتها لى أمى ... ووجدتنى أخط كلمات , كلمات كانت في خيالى كأحلام أتمنى تحقيقها عندما أكبر .... وعندما قرأها جدى أعجب بها جداً وقرر أن يأخذنى أنا وقصتى للقاء الكاتب الكبير , الذى كان له مجلس معتاد في كافيتريا صغيرة في ميامى ولكن للأسف خانتنى ذاكرتى عن تذكر أسمها حالياً ولكنى أتذكر جيداً شكلها الذى لن يمضى من ذاكرتى ما حييت , فهذا اليوم كان أول نبضة حب للكتابة نبضت في قلبى ... واستمررت في دراستى وكنت من أن لأخر أكتب قصصاً قصيرة حتى وصلت للجامعة , كلية التجارة حيث درست , وحيث فزت ثلاث سنين متواصلة بالمركز الأول في مسابقة القصة القصيرة التى تنظمها الجامعة .... وبعد الزواج أكملت مجموعتى القصصية التى لم تر النور بعد لعدة أسباب , المهم رزقت بورداتى الثلاث الجميلات .. وكانت كل الكتب التربوية تنص على أن القراءة قبل النوم مهمة للأطفال

وبالفعل مع كبرى بناتى فاطمة كنت أقرأ لها قليلاً قبل النوم اما ثانى بناتى الست عالية فكانت مختلفة , هى تريد من مامى أن تحكى لها حكاية «من رأسها مش من كتاب» , ومن أجل عالية , بدأت فى تأليف كل أسبوع قصة جديدة , بطلها حيوانها المفضل «الفيل» واسميته الفيل فلفول ... وكنت أضع بين كلمات القصة النصائح التى أريد أن أوصلها لها ولأختها الكبرى فاطمة ولفترة طويلة من الوقت استمر الفيل فلفول رفيق النوم لبناتى , ثم كبرت عالية وفقدت أهتمامها بالفيل فلفول ومغامراته وحل محله قناة الكرتون التى أصبحوا لا يناموا إلا وهى مفتوحة فى التليفزيون الصغير فى حجرتهم , وعندما جاءت اخر العنقود سلى , عاد الفيل فلفول للظهور مرة أخرى , ففى إحدى الليالى طلبت منى أن أحكى لها حكاية فى لا تريد أن تشاهد كارتون وذكرتنى عالية بالفيل فلفول , وظهر الفيل فلفول مع مغامرات جديدة وقررت أن أضع حكاياتى تلك فى مجموعة صغيرة للأطفال , وعندما أنهيت منها أردتها أن تخرج للناس وبدأت أبحث لها عن منفذ لخروج , وشجعتنى أحد صديقاتى أن أقدم مجموعة الفيل فلفول لمجلة قطر الندى وأخذت لى موعد مع رئيس تحرير مجلة قطر الندى الأستاذ عمرو حسنى والذى عرضت عليه المجموعة فقال لى إن المجلة فى تلك الفترة بحاجة لأعمال موجهة للمراهقين وترك لى فترة من الوقت لأفكر وأحضر له الأفكار ... وكان ... بعد مرور عدة أشهر وبعد تفكير عميق لم أجد خيراً من مغامراتى ويوميأتى مع بناتى لتكون محور لأعمالى ....

وبدأت بأولى قصصى «جلسة مصارحة» وعرضتها عليه , ولله الحمد لاقت أعجابه وبدأ الأستاذ عمرو حسنى معى فى رسم التصوير العام لمجموعة متتالية من الحلقات .

وبدأت فى الكتابة كان كل مواقف أو واقعة مع واحدة من بناتى تعطينى

إلهاماً لقصة جديدة , واستمرت أعمالى فى النشر فى مجلة قطر الندى حتى طلب منى رئيس التحرير أن نبدأ مجموعة جديدة للمجلة مواكبة للأحداث الجارية فى البلد وبشرنى أن مجموعة القصص الخاصة بى وبالبنات ستكون كتاباً رائعاً ويومها قالى لى ضاحكاً : «طبعاً بعد ما المجموعة تنزل فى كتاب مش حتجيبى سيرة اللى ساعدك فى الخطوط الأولى لقصصك»

مررت شهور وأكملت مجموعتى المنشورة فى مجلة قطر الندى بمجموعة جديدة من مغامراتى مع بناتى , التى كن أكثر من إلهام لى فى هذا الكتاب , فجانب مساعدة أبنى فاطمة لى بحسها الفنى فى الوصول للشكل النهائى لغلاف الطبعة الأولى مع مصممه أما صغيرتى عالية فكانت القارئة والناقدة الأولى للأعمالى , أما الست سلى آخر العنقود فكانت تقف بجانبى وأنا أكتب تطنطت فرحة وهى تستطيع قراءة كلمات على شاشة الكمبيوتر بعد أن كانت يا دوك تفك الخط .

وبدأت فى عرض مجموعتى على عدد من دور النشر ولم أوافق مع أى منهم, بسبب الظروف التى تمر بها البلد , ولسبب آخر هو إنى كاتبة مغمورة لن يجازف أحد بنشر كتابها , أسباب كثيرة أدت لقرار اتخذته هو أن أطبع كتابى على نفقتى الخاصة , ففى النهاية هذا حلم كل كاتب أن ترى أعماله النور ويلمس بيده آراء الناس فى كتاباته سواء أعجبتهم أم لا.. وجانب هذا الأمل أنا كان لى أمل أكبر , أردت أن أشعر إنى فعلت شيئاً مفيداً فى حياتى وكان لى غرض آخر أكثر أنانية , أردت لعائلتى ولبناتى أن يفتخروا بى حتى ولو بعمل صغير مثل كتابى هذا ...

ريم مراد

ديسمبر ٢٠١٢



فی بیتنا فأر



كنت يا دوك بقعد عشان أتابع آخر حلقة من المسلسل التركي "العشق الممنوع" لما جاني صوت صراخ لولا:

- "مامى... مامى"، هذه النبرة اللي اتعودت عليها، كلما أتخانقت لولا مع موما على لعبة أومع توتا عندما تحول قناة التلفزيون، التلفزيون دا اللي نزلت مخصوص شارع عبد العزيز أجيبه لهم عشان أحطه في أوضتهم وأريح نفسي من "خناقة القنوات"، المهم إني طنشت... ولكن على مين... صرخات متتالية....

- "مامى... مامى... إلحقيني يا مامى... ده بيلعب لي شنباته...."

- "مامى... إلحقيني... و شنباته كمان...؟ أكيد هو واحد من الشبان الي ماجرين الشقة المفروشة الي قدامنا... ليلته سوده... بيلعب شنباته للولا العيلة... مكفهمش العلقة السخنة اللي كلوها من أبو سوسو جارنا لما عاكسوا بنته وهي بتنشر الغسيل... طيب يصبر علي..."

وطيران على حجرة البنات والشرر يتطاير من عيني... ولسه بفتح الباب إلا ولقيت لولا واقفه على مكتبها وموما واقفه جنبها مرعوبة....

- "إيه الي بيحصل يا بنات... مين فيهم اللي بيلعبك شنباته..."

و اشارت لولا للأرض... ولسه بضرب بعيني مكان ما شاورت إلا و شوفته... واقف فعلا بيلعب شنباته... وفي أقل من لحظة وبخفة الفهد كنت واقفة على المكتب مع موما ولولا...

- "دا فعلا واقف وبيلعب شنباته... جه من أنهي مصيبة الفار ده...؟"

- "معرفش يا مامى... كنت أنا وموما بنلعب بالكوتشينة وفجأة لقيناه داخل علينا من البلكونة... ومن ساعتها وهو متمسك مكانه"

وطبعاً كان منظرني وحش أوي وموما بتسألني بمنتهى البراءة: "هو أنتي بتعملي إيه على المكتب يا مامى...؟؟؟ إنت كمان خايفة من الفار...!؟"

ولكن بما إن الرعب كان باين على وجهي وأنا واقفة جنبهم فوق المكتب  
مكنش ينفع أدعي البطولة وأقولهم إني مش خايفة... فأنا طول عمري  
بخاف من أي حاجة بتمشي على أربع... فما بالك بفأر أبيض صغير...؟  
- "يا مامى حنعمل إيه... حنفضل كده فوق المكتب لحد ما بابا  
يجي...؟! وبعدين هو واقف لنا كده ليه...؟! ههش ههش أمشي..."  
- "متقلقوش يا بنات أنا دلوقتي أكلم طنط سميرة جارتنا تخش من باب  
المطبخ وتتصرف مع الفار... مهى مبتخافش منهم..."  
- "وحتكلمها أزاي يا مامى..."  
- "بالمحمول طبعاً يا ناصحة... بس ادعوا معايا إن بطاريات ال أي بود  
اللي توتا حطاه في ودنها تخلص عشان تسمعنا..."  
- "تسمعنا إيه يا مامى... دي بقالها ساعة نايمة وحاطة السمعات في  
ودانها ولا حاسه بحاجة...!" وكانت فرصة وجت للولا عشان تضرب  
زومبة في توتا وأكملت :  
- "مش بابا قالها قبل كده إنها متعليش الصوت أوي كده وإلا حياخد منها  
ال أي بود ده... يا ريته كان أخده..."  
- "هيء هيء... يا ريت... كان زمانها سمعتنا ولحقتنا دلوقتي..."  
- "لحقتنا إيه يا موما... ده توتا بتخاف أكثر منا... ده كان زمان صوتها  
جاب آخر الشارع..."  
- "بس يا بنات أصبروا لحد ما نلاقي حل للموضوع ده... نهشه الأول و  
بعدين نتصرف..."  
وبما إني كان يجب أن أتصرف عشان برستيحي قدام البنات، عملت  
فيها شجيع السيمما ولسه بحط رجلى على الأرض إلا ولقيت المحروس  
جاي علي... طب أعمل إيه...! أعمل إيه...!؟

اللي عرفت أطوله كان خدادية على الكرسي حدفها على توتا عشان  
تصحى وتشوف لنا حل....

ولكن ما أن نزلت المخدة على راس توتا إلا وسرينة أتفتحت من غير ما  
تفتح عينها ولا حتى تشيل الغطا من على راسها:

- "أيه الغباء دا يا لولا... يعني أقوم أضربك دلوقتي...؟ بتحدفيني ليه  
بالمخده يا غلثه...؟"

- "شفتي يا مامى... أهى شتمتني...هي كده على طول و أنا بقولك وأنتي  
مبتصدقينش...."

- "يا بنتي مش وقته دلوقتي...نخلص من المصيبة دي وبعدين حتصرف  
معاها...."

وكان من الواضح لي إن المخدة لن تأتي بنتيجة بما إن الأخت توتا لسه  
تحت الغطا و السماعات في ودانها....ولذا كان يجب اللجوء للخطة  
البديلة ، التي كان يجب استخدام فيه الأحبال الصوتية بأقصى قوة :  
- "توووتا.....إنتي يا توتا.....قوميلي حالا...."

نداء قوي مصحوب بالخديعة الثانية كان فيه الشفا وأخيراً قامت توتا  
وبمنتهى الروقان :

- "مساء الخير يا مامى...."

وبعد السلامة و التحيات ، قامت الست توتا من سريرها ثم نظرت  
متعجبة "مامى هو انتي بتعملي إيه فوق المكتب....؟!"

تعليق جعلني أنا و أخواتها نفطس على روحنا من الضحك... "يعني  
حنكون بنعمل إيه يا أذكى أخواتك....؟ بصي كده تحت رجلكي يا  
فالحة..."

ولحظات وكانت توتا تقف بجانبنا على المكتب.... "يا لهوي ده فار.... دا

بيعمل إيه هنا يا مامى”

وكانت فرصة وجت للولا:”جاي يزورنا ويشرب معنا شاي...” ولسه توتا بتأهب للرد بقذيفة أرض جو... رححت مدياهم صفارة تأجيل المباراة بعد التصرف مع المحروس اللي واقف لنا تحت بيلعبنا شنياته....

وبعد عدة محاولات يهلوانية وصلنا لمحمول توتا ومنه لجارتنا الست سميرة وطلبت منها الحضور بسرعة لأمرهام ومن حسن حظنا إنني تركت باب المطبخ مفتوح للتهوية... لحظات وكانت الست سميرة وبنهما و البواب والست أم هشام واقفين ...

- ”يا خوانا حد يديله بالشبشب قبل ما يجري و منعرفش نمسكه...“  
ولسه عم دياب البواب بيخلع شبشبه عشان يدي للفار على أم رأسه وجدنا هشام ابن أم هشام داخل كالقذيفة وعلى نظام عصام الحضري رمى نفسه قدام الفار يحميه من ”الشبشب الطائر“  
- ”فيفي حبيبتي...ده أنا قلبت الدنيا عليكي...“ ووضع الفار في جيبه بعد ما لطمه بوسة....

وطبعا الصدمة الواضحة على وجه أم هشام كانت اكبر دليل على جهلها بموضوع فيفي الفارة التي اكتشفنا لاحقاً إن الست فيفي دي أحد مشروعات مدرس العلوم في مدرسة هشام وبما أن المدرس لم يستطع أن يتركها في المدرسة خلال الإجازة الصيفية ولا يستطيع أخذها معه بلدته ، وقع الاختيار على هشام لرعاية الفارة خلال الإجازة الصيفية....  
وكانت هذه الفارة وش السعد على أم هشام التي عاقبت ابنها أن يقوم بغسل الصحون طوال فترة الإجازة ”عشان تبقى تخبي عليّ حاجة تانية يا فالج“....

الست سميرة النمامة



لوسألوني عن أهم فنجان قهوة في حياتي ، سأقول هو فنجان القهوة الذي أخذه في صباح آخريوم دراسة قبل الإجازة الصيفية.... واليوم كان ميعادي مع هذا الفنجان... بعد أن خالصنا من أمتحانات آخر السنة والمشاكل المصاحبة : زى الوشوش الجبس اللي باخده كل مرة تعرف لولا أن سأحضر لها مدرس في البيت ، وش جبس من النوع المتين ويصاحبه الجملة المعتاده "أوف أوف هو دروس في المدرسة و درس في البيت" و طبعاً يقابله الرد المعتاد مني "مهولو كنتي بتذاكري وحدك مكنتيش احتجتي لدروس"...ضحايا مزاج لولا كثيرون الضحية الأولى هو الأستاذ إبراهيم مدرس اللغة العربية... إم سائق زوجي عم إبراهيم (كما يناديه الولاد هيم فهوترتيبه الثاني في الضحايا وخصوصاً لو هيوصل لولا الامتحان الصبح ولكن عم دياب البواب فهو الضحية الدائم لمزاج لولا الذي يشبه مزاج البطلة أميرة في فيلم "أه من حواء". المهم إنى اليوم بالذات تنازلت عن هذا الفنجان في سبيل أن أنام لي شويتين.... وقررت الأتى ...

أولاً: أتصلت بالشغالة والغيت عملية تنظيف البيت الأسبوعية.. فالיום سأودع راحة بالي لمدة ثلاث شهور مش طالبة كمان هبد ورزغ في البيت. ثانياً: أدخل أنام كام ساعة مستغلة هدوء المنزل...فلن أستيقظ مفزوعة على نداء "ماما قولي للولا تبطل غلاثة أويا ماما توتا مش عاوزاني أتفرج على برنامج عالم سمسسم" وإلى آخر هذه المشاكل التي حتى مجلس الأمن يعجز عن حلها.

ثالثاً: سأشاهد الفيلم ال(أبيض وأسود) الذي يعرض لأول مرة من يجي 12 سنة.

رابعاً: سأجرب وصفة الأكل اللي شفناها في التلفزيون أنا وجوزي وكان





- "حبايب ماما وحشتوني..."

طبعا توتا لم تفوت الفرصة :

- "حبايب ماما؟؟؟؟!!!! وكمان وحشتوني؟؟؟؟ ومفيش إيه الرن الكثير

ده؟؟؟؟"مامى إنت كويسة؟!"

- "ما تحترمي نفسك يا توتا...إنت بتتريقي ولا إيه...عاوزه مامى تزعل

منا....أعتذريا مامى يا حبيبتى مني ومن توتا..."

طبعا أنا لم اصدق نفسي...لولا تعتذر بالنيابة عن نفسها وعن أختها....

وأكيد فيه حاجة غلط!!!

لم تترك لها توتا الفرصة لتستمر :

- "أيوه كده إظهر و بان عليك الأمان....بقى إنت يا زعايب أمشير عاوزه

تاخدي بُنط على حسابي...يا مامى الهانم اللي عامله اعقل أخواتها نيّلت

الدنيا النهارده في امتحان الإنجليزي"

- "يووووووه يا رخمة و أنت حد قالك تقولي لمامى.....أنا حوريك"

- "توريني إيه يا حلوة، دا أنا اللي حوريكي"

طبعا في مثل هذه الحالة ديه كان زمان صوتي جايب آخر الشارع و

لكن النهاردا بالذات أنا ضميري تعبان وما فياش دماغ لحاجة تانية....

وبعد زن شديد من البنات لطلب أكل جاهز من برة بمناسبة إن النهارده

آخر يوم دراسة، عملتها بجميلة ووافقت على طلبهم وهي ولا جميلة

ولا حاجة دي خيبة مني لأنني ملحقتش أطبخ....بس ياريت اليوم عدّى

كده ، لا، كمل بموما تمسك بطنها من الوجع وطبعا الحالة دي تتطلب

شورية سخنة كما قالت توتا نقلا عن جدتها بعد

أن أعطها التقرير التلفزيوني المعتاد لناانا فور الوصول من المدرسة .

- "يلا واضح كده إن الإجازة السنة دي حتكون حاجة إنما إيه، مهوزي ما

الجواب ببيان من عنوانه الإجازة بتبان من أول يوم لهما.... حاضريا موما  
حعملك الشورية حالاً“

ولسه بقول فينك يا مطبخ ، أفاجأ بجرس الباب و بنت الست سميرة  
واقفة تحمل طبق شوربة “مامى بتقولك اشربيه وهو سخن عشان  
البرد”

لم تمض دقائق حتى انتابتني حالة هستيرية من الضحك....أهي الكدبة  
البيضا جت بفايدة وريحتني من الوقفة أمام البوتجاز في الحرده ، و  
هتفت في سري:

“تعيش الست سميرة النمامة ويسقط الكذب كله إلا الأبيض منه..يلا  
نردها لك في فرح بنتك يا ست سميرة بصنية بسبوسة بالقشطة عمائل  
أيدي و حياة عيني”.



موقعة الملوخية



مع ظهور كوكتيل الأمراض العجيب اللي أصاب العالم ، إشي أنفلوانزا الطيور ، على أنفلوانزا الخنازير، على مياه صرف صحي تستخدم في ري الخضراوات ، على جنون البقر....ظهرت عليّ أعراض مرض جديد:«وسواس الصحة» أو الهسهس كما يسمه زوجي، وكان من الطبيعي أن أن أبدأ في أتخاذ إجراءات شديدة الدقة للمحافظة على صحة البنات وأبوهم ...

وكان أول ضحايا هذا الهسهس هو عم دياب البواب اللي كنت أحلّفه ميت يمين أنه ينقي الخضار بإيده حباية حباية وعود وعود ويشمها عشان يتأكد إن ريحتها حلوة، وكان دايمًا يضحك وأنا أطلب منه هذا الطلب :”يا مدام هو أنا رايح أشتري خضار ولا إزازة كولونيا !!” وكان ثاني الضحايا هو وائل الفرارجي اللي كان لازم يطلع لي الفراخ كلها من الاقفاص عشان اكشف عليها بنفسي على نظام أحمد مظهر في فيلم الأيدي الناعمة .

أما على رأس الضحايا فتأتي في المرتبة الأولى أم إبراهيم الشغالة حيث أجمعت معها أجماع طارئ فوق العادة ووضعت فيه كافة الاحتياطات الصحية للحفاظ على صحة الأسرة وكان من أهمها : أن

تنقع الخضار والفاكهة في قليل من الخل مع الماء بعد أن يغسلوا جيدا بالماء والصابون لقتل الميكروبات، كان أمر مفروغ منه أن تلبس جوانتي بلاستيك عند تحضير السلطة ، يومها نظرت لي أم إبراهيم نظرة سخرية وهي تقول: - “ حاضر يا مدام والله أتكتبتلك يا أم إبراهيم وهتلبسي جوانتي زي الدكاتره”

وهنا ظهرت المشكلة....الخل.... أم إبراهيم وكعادتها القليل عندها كثير فعندما قلت لها قليل من الخل مع الماء كانت تنقع الخضار والفاكهة في





كلامه لي ولأم إبراهيم "مش أنا قلت ميت مرة منغسلش الخضار بالخل".  
-والنعمة يا أستاذ ما غسلته بالخل ، حتى أسأل توتا كانت واقفه معايا  
في المطبخ"

"الملوخية ديه أكيد مغسوله بخل ، دي عبارة عن خل دوقي يا ست هانم  
وشوفي بيحصل إيه في غيابك....":

وبالفعل كانت ملوخية بالخل ولكن والله الحمد طاجن البامية الجاهز  
في التلاجة حل لي هذه المشكلة قبل أن تتفاقم وبعد الغداء أخذت أم  
إبراهيم على جنب وبنظام وكيل النيابة النمس "قوليلي يا أم إبراهيم بيني  
وبينك كده إنتي نسيتي وغسلتي الملوخية بالخل؟ افتكري كده....؟؟؟؟"  
- "يا مدام والنعمة ما حصل أنا معقوله أكسر كلمة للباشا أنا بطلت

خالص اغسل بالخل من يوم ما.....يا لهوي....افتكرت لولا وموما...."  
أنا طبعا سمعت لولا وموما وقلبي وقع في رجلي....اشجيني يا أم إبراهيم  
اشجيني وظهر المستخبي وفهمنا اللغز:

حينما وصل زوجي من الشغل وكالعادة بيقول يا أكل؛ من قبل حتى  
ما يشيل المفتاح من باب الشقة، كانت أم إبراهيم بتحل مشكلة بين  
لولا وموما وبنبت الست سميرة جارتنا واقفة على باب المطبخ مستنية  
طبق الفتة اللي وعدت به أمها من يوم ما جاملتي بطبق الشوربة وهنا  
كعادتها ضربت إم إبراهيم هيس في بيس وعكست الطشتين فحطت  
طشة الملوخية للفتة وحطت طشة الفتة اللي بالخل للملوخية.

وبعد هذه الموقعة تحول زوجي كالحاكم بأمره وضم الملوخية في قائمة  
الممنوعات مع الخل ولكن المشكلة كانت في الست سميرة اللي أمضت  
أيام تطاردني لتأخذ مني الوصفة الجديدة للفتة الجميلة اللي بعتها  
لها....

عمو الصلاة<sup>ع</sup>



هو في العادى المثل بيقول «قليل البخت يلاقى العضم في الكرشة» ولكن الأخت لولا استنسخت مثل آخر من المثل الأصلي .... فاليوم وعلى الصبح كده وانا لسة بفتّح عينيّ لقيت لولا وقفالى تمصمص شفايفها بحسرة و وراها كالعادة تقف ظلها وتابعها الأمين موما ....

- «صحيح ... المنحوس اللي تطلع له حنة اللحمة في الكرشة»

- ها ها ها .. يا ست الفيلسوفة اللي تطلع له حنة لحمه ده يبقى يوم حظه, المنحوس هو الى بيبلاقي عضمه مش لحمه .... وليه نحس وكرشه على الصبح ... ده احنا النهاردة يوم جميل عمتمك عازمانه هي وجوزها على الغدا في النادى ...»

- «وليكي نفس تضحكى يا مامى .. مهوو إنت متعرفيش ...» تعليق مصحوب بنظرة ساخرة

وهنا ارتفعت قرون الاستشعار....

«... معرفش .. ??? معرفش إيه .. ??? هي في إيه يا لولا على الصبح كده..»

-«بس قومي على المطبخ وإنتي هتعرفي كل حاجة ...»

قلبي سقط في ركبتى ... فأخر مرة سمعت فيها الجملة دى كان في عيد الأم اللي فات , لما توتا قادت حملة «يلا ندلع مامى ونحضر لها الفطار» ويأريتهم ما حضروه .. دا مكنش فطار دا . دى كانت مذبحه ولا مذبحه القلعة , راح فيها صنيتين ضحايا بعد ما اتفحموا في الفرن هما والمأسوفة على شباهها الكيكة اللي قعدت توتا تحضر فيها ثلاث ساعات , دا غير طاسة البيض اللي راحت ضحية البيض العيون واللى كان مصيرها هي والبيض في الزبالة ....

وقفت على باب المطبخ وأنا مغمضة عينيّ عشان أخفف الصدمة عن المخيخ ..ثم ضربت نظرة سريعة على رخامات وأرضيات المطبخ..

بتبرق!!!، والبوتجاز.. زى الفل !!! آمال إيه نظام المنحوس والكرشه بتوع لولا دول...؟! مهو المطبخ اهه ببيرق وزى الفل ... ولسه يقول بسم الله وحدخل المطبخ لإلقيت رجلى بطش فى ميه ....

- أوف ... أوف ... اصطبحننا ...» ولقيتنى بمصمص شفایفى وبقول زى البننت لولا « صحیح المنحوس تطلعله العضمه ف الكرشة»  
- يا بنــــــــات ... تعالوا هنا حالاً ... مين اللى عمل العمله السودا دى على الصبح ؟

الثلاثة وقفوا قدامى وبراءة الأطفال فى عيونهم ....  
- احنا ملناش دعوة خالص يا مامى بالقصة دى ... دا احنا صحينا ولسه بنفتح الحنفية عشان نعمل شای ولقينا البلاعة بتبكبك فقلنا ل لولا تصحكي على طول عشان تتصرفى فى.....»  
-«مهو اليوم الحلوبيان من أوله ... شكل عزومة عمتكم كده اتضربت...»  
-ليه بس ...؟! مش إنتى اللى دايماً بتقولى لنا خليككم متفائلين؟! ...  
خليكى متفائلة يا مامى ...»

رد جئنى من لولا فيلسوفة العيلة وتبعه كالعادة تعليق من موما :  
«يا مامى بسيتة (بسيطة) .. كلنى «عمو الصّلاح» بيحى على طول يصلحها ونروح النادى مع سمسسم ودودا وولاد عمتنا»  
نظرة نارية من لولا تبعتها جملة اعتراضية «ونسيتى ليه زيزو ومودى يا ست موما . عشان يعنى كبروا ومبيلعبوش معاكى ...»  
- «إيه ..إيه ... مش وقت خناق دلوقتى .. الموضوع مش سهل خالص لسه حلنى عقبال مال «الصّلاح» يوه قصدى «السباك» بيحى .. ونشوف بقى الفتح والنصب اللى حيقلنا عليها ..»  
طبعاً وكما توقعت , بوز توتا المتين اشتغل :

«مهويا مامى ممكن نازل وبعدين لما نرجع نبقى نجيب السباك ...  
اهو نضرب عصفورين بحجر واحد نروح النادي ولما نرجع نصلح  
الحوض ولا البلاعة دى ...»

نظرات أعجاب من لولا وموما تجاه الأخت توتا «أيوة .. يا توتا هو دا  
الكلام ... هيه .. هيه . يلا بينا ع النادي»

وهنا بدأ دى يفور مع زيادة معدل الماء الخارج من البلاعة .. «هيه هيه  
ويالا بينا ع النادي اما فكرة يا بنات كانت تاها عنى فين .. سيبيكم أنتم  
اننا حنرجع نلاقى الميه مغرقة البيت كله بس مش مشكلة المهم منفوتش  
النادى ... صحيح العقل زينة»

بوز وأفافات .. والنظر فى الساعة كل دقيقتين مع السؤال المعاد ثلاثين  
مرة «هو البيه السباك ده هيجى إمتى ,فاضل ساعة وبابا يخلص شغل  
ويجى ياخذنا»

وأخيرا دق جرس الباب ووصل البيه السباك يتبعه حامل الحقيبة  
الذى كان يسمى زمان صبي السباك ولكن مع التقدم التكنولوجى أصبح  
أسمه مساعد السباك أو حامل الحقيبة كما أطلقت عليه توتا ... وبدأ  
الكشف ... ومع نظرات تتسم بالجدية قال لى التشخيص .. «يا مدام  
البلاعة مسدودة..»

ما أن سمعت توتا التشخيص إلا ومالت على أذنى وهى تضحك :  
«ياه يا مامى إية العبقرية دى .. البلاعة مسدودة ..؟ ده بصحيح جاب  
الديب من ديله..»

«بس عيب كده يا بنت ، وبعدين نعمل إيه بقى لو سمعك وركب دماغه  
ومشى وسابنا لايصين زى ما عمل عند طنطك دلال اللى فى السابح لما  
ابنها قاله يا أسطى بدل يا بشمهندس»

ولسه مكملتش الكلمة إلا وكانت أغنية «تايستيك» بتصيح في أرجاء المطبخ من موبايل السباك وعند هذه النقطة حاولت أتفادي أى نظرات بيني وبين توتا لأنى كنت متأكدة من رد فعلها كأن لسان حالها سيقول وكمان تايئك...!!!»

لحظات كان حامل الحقيبة قد قام بتسليك البلاعة تحت إشراف البيه السباك ، دقائق ووجدت أمامى فاتورة بخمسة وثمانين جنيه..«خمسة وثمانين جنيهه ليه يا بشمهندس .. هو أنت فتحت عكا .. دا حتى الصبى بتاعك هو اللى سلكها...»

-يامدام لوبصيتى فى الفاتورة هتلاقى إن الفزيتة زائد تسليك البلاعة هى تسعين جنيهية ، بس أنا عامل ديسكونت الأيام دية عشان ظروف البلد ... ولا مؤاخذة يا مدام هو ده الشيستم بتاعى ...»  
وبعد مداولات ومفاوضات خفض البيه السباك الفيزيتة لخمسين جنيهية بالعافية ونزل وهو بيحلف ميت يمين إنه ميعتبش العمارة دى تانى ابدأ...

وطبعاً كان الباش سباك هو محور حديث البنات مع أبيهم طوال الطريق.. وما إن سمع زوجى تسعيرة تسليك البلاعة ، قرر أن يأخذ كورس مكثف فى فن تسليك البلاعات !!!!

يا مطرة رخی رخی



بالنسبة لى أجراس المتتالية على باب الشقة يعتبر عندى شيء غير مباشر بالمرّة.....فمعناه حاجتين ملهمش تالت يا إما فيه مصيبة يا إما فيه كارثة و دقات اليوم كانت تحمل لى مصيبة وكارثة مجتمعين....مرات البواب أم سلامة تقف على الباب تصرخ " ألحقي يا مدام، الشقة بتاعتك بتغرق...."

- " بتغرق إيه يا أم سلامة؟ سلامة عقلك! مهي الدنيا ناشفة قدامك أهي...."

ضحكة ساخرة " شكلك لسه يا مدام مدخلتيش المطبخ....ده المية الي نازلة من عندك مغرقة المنور"

- "مطبخ إيه على الصبح؟ ده أنا لسه قايمة على رزحك على الباب، ده أكيد من أي شقة تانية على إيدك السباك لسه مسلك البلاعة من يومين...." ووصلت لباب المطبخ وهنا كانت الطامة الكرسي ، سيول تنزل من السقف....

وكانت البداية مع طشت الغسيل الذي أنقذ الموقف مؤقتا وأم سلامة مرات البواب التي ساعدتني في نزح المياه ولكن المشكلة الكبرى كانت في مصدر المياه ، شقة جارنا الأستاذ وليد....

بدأت جولة مفاوضات مع عم دياب البواب، الذي رفض رفضا باتا أن يجيء ناحية الأستاذ وليد ولا شقته ولا حتى عتبة بيته...  
- "يا عم دياب يهديك يرضيك...وحياة أم سلامة الغالية...طيب وحياة سلامة..."

- "يا مدام هو أنا مستغني عن عمرى...مهو إنتي عارفاه راجل عصبي... على يدك آخر مرة رحيت أطلب منه نصيبه في تصليح الأسانسير كان حيحدفني من الدور الخامس لولاش بس سترربنا ودعا أمي الله يبشباش

الطوبة اللي تحت راسها...”

-”يعني يا عم دياب يرضيك إن الشقة تغرق؟! مهبورضه ميصحش أطلع

أنا أكلمه وأنت عارف إن مراته مسافرة...”

-”مهويا مدام لومراته كانت موجودة كان زمان المشكلة اتحلّت ، دي ست

زي السكرة...مش عارف دي بتتفاهم معاه إزاي...وبعدين الطشت قام

بالواجب واهي أم سلامة معاكي عقبال ما جوز حضرتك يجي بالسلامة

ويطلع يتفاهم معاه.”

من يوم ما الأستاذ وليد ده سكن فوقنا وأنا مش متفائلة خالص... كل

يوم خناقة ومشاكل...مرة مع البواب...مرة مع المكوجي..ده غير محصل

الكهربا المسكين اللي كان حيروح فطيس الشهر ده لما الفاتورة جت

غالية .

في كل مرة أم سلامة مرات البواب تأتي لتظيف المطبخ كانت تحكي لي

موجز الخناقة الجديدة وكل مرة أقولها ”ميت مرة أقولك وأنا مالي إنتي

عارفة إني مليش في حكاوي القهاوي بتاعتك إنتي وفريق ستات

العمارة.....”

وكل مرة تكون إجابتها واحدة ”يا مدام أهو أنا بأسليكي عقبال ما أخلص

المطبخ واهو برضه تبقي عندك فكرة عن الأشكال الي حدفها علينا

صاحب العمارة الجديد.....”

أصوات مداولاتي مع عم دياب كانت كفييلة أن توقظ موما التي تستيقظ

من أقل صوت وما إن رأّت الماء النازل من السقف إلا وأطلقت صرخات

الفرح:

- ” السقف بييمطر السقف بييمطر..... لولا، توتا... أصحابا... الحقوا....

سقف المطبخ بييمطر...”

وكان أول تعليق كالعادة مصدره فم توتا الي بينقط زلط :

-”هو من يوم ما السباك بوز الأّخس بتاع تيتانك حط رجله الكريمة في مطبخنا وكل شوية مشكلة جديدة في المطبخ“

جملة تحفتني بيها توتا و أنا واقفة أنزح سيول المية اللي نازلته تخرفوق دماغنا من سقف المطبخ “

«والنبي يا توتا العملية مش ناقصة تريقة واستطراف...سيبيني في الهم إالي أنا فيه “

-”همّ إيه بس يا مامى...بسيطة خلي بابا يطلب من الأستاذ وليد جارنا يجيب سباك يصلحله إالي بايظ عنده“

وهنا تدخلت فيلسوفة العيلة، الست لولا:

-”يا توتا يا مفترية عاوزة بابا يطلع عشان الأستاذ وليد يتخانق معاه“

-”وإنت إيش حشرك يا رخمة...أكيد بابا حيعرف يتصرف معاه...“

-”هاف تايم يا بنات...اهدوا شوية عقبال ما نلاقي حل للميه اللي بترخ فوق دماغنا دي قبل ما تتحول لفيضان وتغرق الشقة“

الشرر الذي كان بيطنطط من عيني كان كافي أن يقطع المناقشة الدائرة بين البنات وكان أكثر من كافي ليعطي لعم دياب الشجاعة الكافية إنه يطلع زي الصاروخ لجارنا...

ولكن للأسف بعد أربع محاولات فاشلة مع الأستاذ وليد لم يعط فيهم الفرصة لعم دياب أن ينطق فيها سوى “كلمتين صباح الخير يا أستاذ وليد”، أعلن عم دياب انتهاء المفاوضات رسمياً...

خصوصاً إن آخر محاولة جاب صوت الأستاذ وليد آخر الشارع وهو يحذر عم دياب من الطلوع مرة أخرى فهو مريض ولا يريد إزعاج ولا يهمله أن يعرف ماذا يريد منه عم دياب ، وأعطاه الطريحة التمام قبل

ما يزرع باب الشقة وراه "مهو إنت يا بواب الهم مبيجيش من وراك إلا وجع الدماغ". وهنا اشفقت على عم دياب وشيبة رأسه من الهدلة على يد جارنا الذي سيكون أول الخاسرين لو مصلحش سبابة شقته الخريانة...

بجانب مشكلة المطرة اللي عمالة ترخ كان عندي بعض المشاكل الجانبية: البنات و خناقهم وزتهم...فاليوم أجازتهم وكنت وعدتهم أن يذهبوا معي للسوبرماركت وبالطبع الزن كان شغال على ودنه عندما جاءتني نجدة من السماء : مكالمة من أختي تستأذني أن تأخذ البنات النادي مع أبنائها.....وعلى يدها تخلصت من إحدى مشاكلي ولكن بقيت المشكلة الكبرى...المطرة اللي عمالة ترخ...وعلى غير عادتي استسلمت للأمر الواقع بعد أن أقتنعت بعدم جدوى المحاولة مع جارنا وأن الحل الأمثل هو الطشت و الانتظار للغد حتى وصول زوجة الأستاذ وليد.... والتي ما إن وصلت من السفر حتى ملأ صوت صراخها أرجاء العمارة... فالمطرة التي كانت ترخ فوق دماغنا كانت في نفس الوقت فيضان من الماء في مطبخها والذي سرح منه لحجرة الصالون التي كانت تخزن فيها زوجة الأستاذ وليد جهاز ابنتها العروسة...

ومنذ ذلك اليوم و بعد أن أمضى الأستاذ وليد الأمسية في نزح الماء و مساعدة زوجته في إنقاذ ما يمكن إنقاذه من السجاجيد والأثاث، أصبح الأستاذ وليد شخصية أخرى...حتى إن عم دياب البواب كان يقرص نفسه غير مصدق في كل مرة يقول له فيها الأستاذ وليد مبتسما:  
"صباح الخير يا عم دياب ..."

الست الطيبة بتاعت السنان





ولكن بطلوع الروح وبعد صراخ و تهديد يسمعه كل من في عمارتنا.. معركة غسيل الأسنان بدأت مع توتا واستمرت مع لولا ولكن مع موما... آخر العنقود..حكمتي تغلبت على صوتي، فأستبدلت أسلوب التهديد والصراخ لأسلوب الست الطيبة بتاعت السنان ....

زمان في طفولتنا كان نظام اضرب المربوط يخاف السايب بيشتغل تمام.... ولكن للأسف في العصر الحالي أصبح ولا المربوط بينضرب ولا السايب بيخاف....أصبح الإقناع هو الوسيلة الوحيدة للتفاهم...وطبعا إقناع إيه مع موما ؟ وهي تشاهد منذ نعومة اظافرها المعركة اليومية لغسيل الأسنان لكل من توتا ولولا، التي تبدأ بالجمل المعتاده “أنا تعبانة....هو يعني لازم اغسل سناني الليلة دي....ما أنا غسلتهم الصبح....” وتنتهي بغسيل أسنانهم مع تسجيل عدة جمل اعتراضية من توتا ولولا على نظام: “يا مامى أنا كبرت خلاص عشان تفكريني أغسل سناني كل ليلة” وكان من الضروري أتوصل لفكرة توفرعليّ تلك المعاناة اليومية لفرشاة الأسنان والمعجون مع آخر العنقود....، وهنا أخترت النسخة “المعربة” من فكرة ساحرة الأسنان الطيبة بتاعت الفيلم الأجنبي، فكرة مختلفة أيضا عن ثقافة نرمي السنة المخلوعة للشمس ونغي لها “يا شمس يا شموسة خدي سنة الجاموسة وهاتي سنة العروسة....”. وطبعا تم تنفيذ الفكرة بعد مناقشات مضمّنية بيني وبين البنات حول الساحرة الطيبة بتاعت الفيلم الأجنبي....

بدأتها موما بسؤال بريء:

-”ليه يا مامى احنا معندناش ساحرة طيبة زي اللي في الفيلم عشان تدينا هدايا...”

وهنا تدخلت لولا :

- "عشان يا فالحة لو مرمناش السنه المخلوعه للشمس الشموسا  
حتطلع بدلها سنة جاموسة..."

وكالعادة أعرضت توتا "متصدقيش يا موما الكلام ده...مهو حتى لورمت  
الست لولا كل أسنانها للشمس ، حيطلع لها برضه سنان جاموسة....  
هاهاها "

- "يا مامى شاهدة على الكلام اللى توتا بتقوله...أنا سناني سنان  
جاموسة..."

- "لا يا حبيبة أمك، دا مفيش زي سنانك صفين لولي والبركة فيا ، يعني  
لو مكنتش كل ليلة بحارب عشان غسيل سنانكم كان زمانك انتي وتوتا  
سنانكم ولا سنان فرنكشتاين.....يلا عقبال سنانك أنتي كمان يا موما ما  
تبقى صفين لولي "

- "مهو أنا بغسل سناني يا مامى ...مش أنتي بتشوفيني..."  
- "أيوا يا حبيبتى بتغسلي سنانك سطرأه و سطر لأ...يا سلام لو غسلت  
سنانك كويس كان زمانك دلوقتي عندك هدايا كتير..."  
- "هدايا... هيه هيه... إزاي يا مامى إزاي...؟؟"

وطبعاً عند هذه النقطة كسبت انتباه موما الكامل وجزء صغير من  
أهتمام لولا أما توتا ففقدت أهتمامها من ثاني جملة...  
- "إزاي بقه يا مامى...؟؟ زاي بقه يا مامى...؟؟"

ألحت علي لولا وموما ألحاحاً قوياً..فالموضوع فيه هدايا...فرصة  
متفوتش لهم...ولي طبعاً...

- "عاوزين تعرفوا...حقولكم...بس بعد ما تخلصوا عشاكم و تغسلوا  
سنانكم وتخشوا السرير..."

وكانت محاولة مني لكسب وقت لأفكر كيف أخرج من هذا المطب الذي

أوقعت نفسي فيه...هدايا...هو أنا كنت ناقصه مصاريف.. بس  
برضه لو هديتين بساط يوفروا علي ماتش غسيل الأسنان بتاع كل ليلة  
تبقى حاجة تمام....

في صوت واحد نادى عليّ لولا و موما "جاهزين خلاص يا مامى و غسلنا  
سناننا كويس كمان....يلاقولي لنا بقى...."

- "بصوا بقى يا بناتي يا حلوين..هو أنا سمعت زمان من جدتي إن فيه  
ست طيبة عجوزة بتيجي لكل واحد خلع سنة أو ضرس وتأخذ السنة من  
تحت المخدة بالليل وهو نايم وتكشف عليها، لو ملقتش فيها سوس يبقى  
الولد أو البنات دول كانوا بيغسلوا سنانهم كويس.تقوم واخده السنة  
وتحط لهم بدالها هدية أو فلوس..."

وهنا كالعادة تدخلت فيلسوفة العائلة الست لولا:

- "طيب وهي حتعرف منين إننا بنغسل سناننا كويس ، مهو أحنا ممكن  
نغسل أسناننا كده وكده ونضحك عليها..."

- "إزاي بقه يا لولا، دا مامى بتقولك ست عجوزة و طيبة ، يعني بتعرف  
كل حاجة أكيد بتعرف كل حاجه..."

ونتج عن هذا الحديث الانتظام والدقة في غسيل الأسنان .... مع انتظار  
الهدية من الست الطيبة بتاعة السنان مع كل سنة تتخلع....ونتج  
عنه أيضا لخبطة في المصاريف بس برضه كله يهون ....حتى حصلت  
المشكلة....خلعت موما أحد أسنانها ولكن للأسف في هذا اليوم كان  
يجب أن أصطحب أبي للطبيب ولم أعرف بخلع السنة إلا مع وصلة الزن  
الصباحية من موما التي وجدت سنتها كما هي....ومنذ هذا اليوم و أنا  
أعمل بنصيحة أمي القديمة: "يا بنتي الواحد قبل ما ينطق بحاجة يعدّ  
جوه نفسه لحد عشرة..." ولكن أنا أصبحت قبل أن أوعد البنات بأى  
حاجة أعد لحد ألف.....

الساعة سبعة



- "مامى.....مامى.... النهاردة "أدازة"!!!!!!"

- "أجازة.....؟؟ إيه ...؟؟ مين.....؟؟؟ هي الساعة كام.....؟؟؟"

نظرت بطرف عيني نحو المنبه : "الساعة سابعة...."

- "يا خبر أبيض ..... !! الساعة سابعة.....!! أتوبيس المدرسة.....!! يا نهار باين

من أوله...."

و في ثانية كنت خارج السرير ....خفيفة كالعصفورة....سريعة كالفهد

انقضضت على الموبايل في محاولة لإنقاذ ما يمكن إنقاذه ولكن في الواقع

لم يكن هناك شيء لإنقاذه بعد أن بلغني سائق اتوبيس المدرسة إنه على

مشارف المعادي قفلت الخط وأنا ألعن المنبه والمحمول وحظي و اليوم

اللي باين من أوله....فمعنى ذلك إن عندي رحلة لآخر المعادي لتوصيل

البنات للمدرسة ومن ثم يجب أن نكون في الشارع خلال نصف ساعة...

ومن ثم لن يكون لدي وقت لتحضير أكل طازج اليوم....

- "يعني أكل بايت وطبعاً برطمة وإضراب البنات عن الأكل النهارده...بس

يعني أعمل إيه....ماهو أنا عشان أجهز أكل الغداء دلوقتي يعني راحت

المدرسة و امتحانات الشهر على البنات....."

و في ثواني كنت أحت بل كنت أرجو راس المنصر الكبير توتا أن تساعد

أختها ليلبسوا بسرعة.....و على غير العادة كنا خارج المنزل خلال ٢٦

دقيقة....

- "يلا على العربية بسرعة يا بنات"

- "يا مامى دا دوري عشان أقعد أدام"

سارعت توتا بالجلوس في المقعد الأمامي غير عابئة بسرينة لولا التي

بدأت مطالبة بحقها في الجلوس "أدام".....طبعاً لا حياة لمن ينادي.... أما

انا "فعملت فيها الطرشة"....

ولكن ليكتمل اليوم تحالفت السيارة مع المنبه والموبايل ولم تدور.....  
-”يعني جت عليها....لما اليوم يبدأ كده آمال حيخلص إزاي...؟؟؟ أوف...  
أوف...!!!

-”مامي...مش أنتي قلتي إن الأفأأة عيب....تحبيي اقول لمامتك...؟؟؟“  
تلقائية تعليق موما جعل ضحكة تتسلل مني بالرغم من اليوم المكعبل  
ده.....

وكان الحل الوحيد هو التاكسي....و ما أدراكم ما التاكسي في الصباح  
الباكر....ولكن الظروف خدمتني بتاكسي وقف لنا على الفور...وقلت  
محدثه نفسي...

-”اليوم شكله حيضحكلي أخيراً...تاكسي ومن أول ندهه....“  
ولكن إذا عرف السبب بطل العجب....فسائق التاكسي الهمام كان من  
الرعيّل الأول لسائقي التاكسي....أي إنه تقريبا بدأ سواقة من أيام الملك  
فؤاد....أيام ما كانت السرعة القصوى ٤٠  
-”وحياتك ياسطى سرع شوية أحسن الولاد حيتأخروا على الحصة  
الأولنية...“

-”ياست العجلة من الشيطان....“  
لم تكن المشكلة الوحيدة بالنسبة لي في التأخير هي اليوم الدراسي  
والامتحانات الضائعة ولكن المشكلة الأكبر حتكون بالنسبة لي العذاب  
كله....لأني حرجع بالكتاكيث دول تاني البيت وحيروح عليّ كورس  
الترجمة اللي باخده في الجامعة الأمريكية....  
-”معلش ياسطى عشان خاطر الكتاكيث الحلويين دول بسرعة أحسن  
تروح عليهم الامتحانات...“

-”يا قوي....عمري ما عملتها إني أسوق بسرعه كده من يوم ما أم العيال

الواد اتزنق في بطنها وجريت بها على المستشفى....حأسرع المردي كمان  
عشان خاطر أحباب الله دوله....”

وأخيرا بعد معاناة فظيعة من سائق مقتنع إن العجلة من الشيطان  
وحرقة أعصاب من أم أعصابها بايظة من ضياع أمتحانات الشهر على  
بناتها ورجوعها بهم للبيت قفاها يأمر عيش.....عبرنا المانش....وصلنا  
المدرسة وقبل طابور المدرسة ما يبدأ كمان.....

يعني حأوفر على نفسي خطبة الاعتذار للناظرة لتسمح لهم بالدخول  
نظرت في الساعة اللي كانت داخله على التاسعة وانا في انتظار تاكسي  
فاضي ليأخذني للجامعة في التجمع الخامس....و الدقيقة تجري ورا  
الدقيقة لحد ما قفلت الساعة عشرة وعندها تأكدي إني لن أصل  
لكورسي في ميعاده....

ولأول مرة منذ الصباح قررت أن أستفيد بكعبلة اليوم وأن يكون اليوم  
هو اليوم الذي أهزم فيه حلّة محشي الكرنب اللي دايمًا ما بتتبطش  
معايا وعلى طول مقصرة رقبتى قدام العيال وأبوهم اللي بيستغل أي  
فرصة عشان يتريق على محشي الكرنب بتاعي ...

ومن مدرسة العيال لسوق الخضار اشتريت كرنبة و مستلزماتها ومنه  
للبيت...فتحت الراديو على نجوم أف أم وقعدت ألف أحلى حلة محشي  
كرنب ده طبعا بعد ما أخذت الوصفة من أستاذة الكرنب في عمارتنا  
الست شوقية ....

”-يبب.....يبب...“

كلاكسات متواصلة معناها كالعادة إن التتار وصلوا ،ولكن مالم يكن  
معتاد هو الهدووووء.... فلم أسمع أقدامهم على سلم العمارة خلال  
سباق(مين الأول للوصول للشقة؟)....والذي دوما يحسم لصالح لولا و

ينتهي ببكاء موما وشكوتها أن اختها زعدتها لتسببها.... ونظرة (إيه التفاهة دي) من توتا.... وكلمتين من الأستاذ سلامة جارنا بسبب دوشة البنات.... وعندما فتحت باب الشقة لأطمئن على بناتي العزيزات.... كدت أقع على الأرض من الضحك...

فهاهي توتا تشمشم كالقطة الجائعة أمام محل كبايجي.... "شامين يا بنات... ريحة محشي الكرنب الحلوة دي..."  
وعندها مصممت لولا شفايفها: "أكيد الريحة دي جاية من عند طنط شوقية اللي في الرابع.... يا بخت ولادها.... مامتهم قاعدلهم في البيت طول اليوم وكل يوم تتحفهم بأكلة جديدة"  
و لكن رائحة المحشي المنبعثة من شقتنا و ابتسامتي العريضة التي استقبلتهم بها قطعت عليهم المناقشة...

وكانت فرصة وهم يأكلون أن انهمم لشطارة أمهم التي لا يعصى عليها أكلة، والتي تستغل أسوأ الظروف لتخرج منها بفائدة وطبعاً لم أرحمهم من محاضرة صغيرة عن كيفية الاستفادة القصوى من أي موقف و تحويله لصالحنا، ثم طبعاً ختمتها "بحنة أمينة رزق" وأمهم التي ضحت بيوم دراسي في الجامعة لتعمل لهم حلة المحشي التمام اللي كان نفسهم فيها من زمان.....

جلسة مصارحة



للمرة العاشرة هذا الشهر تنقطع الكهرباء....للمرة العاشرة هذا الشهر بناتي يتأففن من قطع الكهرباء....و لكن للمرة الأولى لنا نعد جلسة مصارحة خلال مدة الظلام الإجباري...

واه فرحتاه عندما يتحالف القدر مع رغباتنا... توتا كبرى بناتي نسيت أن تشحن المحمول ، بالتالي "راحت" عليها فرصة "الرغي" فيه حتى تمرفرة الظلام في أمان بدون أن تدخل كطرف استشاري لفض منازعات أختيما الصغيرتين....و نتج عن ذلك أمران و كلاهما أحلى من بعض....: الأول: رصيد تليفون توتا" مش حيزرب" زى كل مرة انقطعت فيها الكهرباء..... ثانيا والأهم: عقدنا جلسة عائلية لأول مرة منذ زمن....

بدأنا الجلسة بأهات و أنين و صب اللعنات على شركة الكهرباء الملعونة التي تسببت في ضياع المعلومات "القيمة" التي كانت ثانيا بناتي لولا ذات الحادية عشر تكتتها على جهاز الكمبيوتر، زائد سرينة من صرخات الخوف من الظلام التي تطلقها صغرى بناتي موما في كل مرة تنقطع الكهرباء....و بعد هدوء الحالة و الرضا بالأمر الواقع لم يجدوا أمامهم حلاً سوى الموافقة على مقترحي "جلسة المصارحة" التي كانت هي الحل الوحيد المتاح لهن لقضاء الوقت حتى نخرج من ظلام العصر الحجري كما تطلق عليها توتا....

و بمنتى الأمل و التفاؤل بدأت:

- "تخيلوا يا بنات لو الكهربا فضلت مقطوعة كده كام يوم .... تفتكروا  
حیحصل إيه ؟؟؟؟"

- "إزاي يعني يا مامي منعرفش نخش الحمام و المطبخ عشان ناكل ولا  
ال....."

- "بسيطة يا موما.....نستعمل الشمع و البطاريات" ردت عليها لولا، ثم

أكملت

-”بس بيقولوا بتحصل حالات هرج و مرج لما بيطول انقطاع الكهرباء أيام..... وربنا يخليكوا محدش يسألني يعني إيه هرج و مرج.... أنا سمعتها كده....”

-”جايز قصدهم هرج ولم يعد...ههههه” قالت توتا ولم تكذب الابتسامة تصل لفي والتفاؤل لقلبي إن الجلسة بدأت تأخذ منحى لطيف ، إلا وهوبًا قامت توتا رازعة لولا كلمتين في جناها ”لما الواحد يقول حاجة لازم يبقى عارف معناها.... مش كلام ووجع دماغ والسلام...”

طبعًا أنا أخذتها فرصة :”مش قلنا قبل كده يا توتا إننا نخفف أسلوب النيران الصديقة دي.... وبعدين سمعينا صوتك....أتحفينا بكام اقتراح من اقتراحاتك الفذة في حالة إن الكهرباء تحفضل مقطوعة حيحصل إيه في رأيك؟؟!!”

قهقهة ساخرة أطلقتها توتا:”نعمل إيه لو قعدنا كده منغير كهرباء...دي تبقى مصيبة...لا كمبيوتر و لا محمول و لا تلفزيون....آمال حنعيش ليه....بيتهيألي إن الواحد ساعتها يعمل بيات شتوي زي الدب لحد ما ترجع الكهرباء....”

وهنا سنحت الفرصة للولا :”وزى ليه....؟؟؟ههههه...” وطبعًا لم تكذب الجملة حتى كادت الحرب العالمية الثالثة تقوم في بيتنا....لولا تدخل حنجرتي الجبارة في وضع حد لكلمتين كادتا أن تحول الموقف لمعركة كلامية .

وأخيراً نطقت موما التي يصيبها قطع الكهرباء بخرس ظلامي : ” يعني إيه يا مامي بيات شتوي اللي توتا عاوزه تعمله دا...؟؟؟”

وكالعادة لم تفوت لولا الفرصة:

- "يعني يا فالحة كنتي فهمتي نيران صديقة ولا فهمتي هرج و مرج لما

بتسألني عن البيات الشتوي...!!"

أكملت توتا ليكون لها الكلمة الأخيرة :

- "لك حق والله يا لولا مش ناقصنا إلا "ذرده" دي كمان....".

- "يعني أخيراً اتفقتما أنت ولولا .... فعلا زمن المعجزات لم ينتهي.."

نظرت لي توتا نظرة كلها شماتة:

- "شفتي بقى يا مامي أديكي عرفتي بطريقة عملية يحصل أيه لو الكهريا

فضلت مقطوعة....."

وأكملت كلامها - غالبا عشان تكمل على أعصابي :

- "أحمدي ربنا على التكنولوجيا الحديثة...أهي بتخلي كل واحدة فينا في

حالتها ، لا كلام ولا خناقات ولا وجع قلب ....."

وكانت هذه الجملة هي القشة التي قصمت ظهر البعير.....وعندها لمعت

في رأسي فكرة أتبعها بقرار.....!!!!!!

## قرار هام لعائلتنا الكريمة:

نقوم بقطع الكهرباء بإرادتنا الحرة لمدة ساعتين أسبوعياً لنعقد جلسة مصارحة وتقريب وجهات النظر والأهم أن نضع التكنولوجيا في نصابها الطبيعي: فالمشاعروالتواصل بين أفراد الأسرة أهم بكثير من التكنولوجيا والتباعد.....

# الخطبة



طبعا بعد جلسة المصارحة السابقة مع بناتي العزيزات خرجت بورقة عمل كما يقولون في الاجتماعات المهمة...تحتوي على النقاط المطلوب تصحيحها في عائلتي ولكنها لم تكن تحتوي على الحل...فالحل كان في رأسي على رأي أحد ممثلينا عندما قال :”العلم في الراس مش في الكراس”...الحل..الحل...الحل...سأبدأ ببنااتي واحدة واحدة ....طبعا سأبدأ بالبطة الكبيرة...زعيمة عصابة (الأناتيخ الالكترونيين).

ببراءة الأطفال في عيني بلّغت البنات بوجود سفري لعدة أيام لواحة سيوة لحضور مؤتمر عن الترجمة كتدريب مكمل للكورس الذي أخذه في الجامعة....وطبعا سارعت كل من توتا ولولا بإخلاء مسئوليتهم عن الذهاب معي لعدم تحملهما حرارة الجو والحياة الطبيعية..... وكالعادة قالت لي موما:” أنا معاكي يا مامي ”

لكن أنا كان لي خطة مختلفة: يجب أن أبدأ بالرأس الكبيرة ، رأس المنصر والقائد الأعلى للأخوة الحلفاء في منزلنا العامر.....

في هذه الحالة كان يجب أن أخرج بخطة محكمة تجعلها تتنافس مع أختها على من سيصحبني في هذه الرحلة الميمونة.....

على مائدة الإفطارأخذت قراري ببداية ساعة الصفر للمعركة الكبرى..... معركة تحرير عقل كبرى بناتي من الاحتلال الإلكتروني.

نظرت لزوجي والذي كان على علم بهذه الخطة .... وكان أيضا متأكداً من فشلها ولكنه وافقني من باب (درء المفاسد مقدم على جلب المنافع).....

فبالنسبة له هذه الخطة كانت ستعود بمنفعة كبرى سيستمع بمشاهدة مباريات الدوري الإنجليزي بدون الموسيقى التصويرية لبيتنا التي تبدأ بالنداء البسيط على إحدى البنات و تصل لشخطة عابرة الحجرات مصحوبة بسرينة إنذار تحمل نبرة تهديد ووعيد بالحرمان من

الذهاب للنادي يوم الخميس فذهابي مع الرأس الكبرى وذهاب البنيتين  
لأمي سيعطيه هدنة حلوة.....

المهم، نرجع لمائدة الإفطار...رميت طعام بسيط : "تخيل يا حبيبي إن  
منظمي المؤتمر حجزوا لي ولكل زملائي في الجامعة في فندق خمس نجوم  
خلال فترة المؤتمر...لسوء حظك إن أمي عيانة وإلا كان زمانها قاعدة مع  
البنات وأنت جيت تستمتع معي برفاهية الفندق والمناظر الطبيعية....  
ده حتى فيه 150 قناة للدش ووصلة مجانية للنت..."

و طبعا على مفض أجايني من بين صفحات الجرائد التي يهرب بينها  
من المناقشات الصباحية هذا الهروب الذي يعتبر السبب الرئيسي في  
إصابتي بعسر هضم وانتفاخ مزمن في القولون : "معلش مليش نصيب  
في الرحلة دية.....ماتخدي واحده من البنات معاكي..."

وهنا بدأت الخطة تأتي بثمارها، نظرات متبادلة بين توتا ولولا.....ثم  
اقترح ذو مغزى من لولا:

"طيب ما نروح كلنا معاكي يا مامي..."

"يا سلام يا سلام" ....أجبتها وأنا أضحك ....ولا أنتي ولا موما ممكن  
تيجوا معايا الرحلة دية ، مقدرش اسيبكم وحدكم في الحجرة او في  
حمام السباحة.....

"يا مامي توتا ممكن تيجي وتقعدي معاينا...؟"

"ياريت يا حبيبي ولكن قواعد المؤتمر أني لا أستطيع اصطحاب من هم  
دون الثالثة عشرة بدون مرافق كبير..."

وأكملت وانا أتأمل رد الفعل على وجه توتا التي كانت تتابع كل ذلك وهي  
كما يقولون "لابسه وش جيس" ولكني متأكدة إنها في داخلها ستجن منذ  
سمعت كلمة فندق خمس نجوم و150 قناة دش ووصلة نت.....

- " الوحيدة اللي ممكن أن تيجي هي توتا ولكنها رفضت و أنا مقدرش أجبرها على الذهاب في رحلة لا تريدها.....فالغرض من أي نزهة أو رحلة هو الاستمتاع والرجوع وشعور بالسعادة يملأنا .... يلا بقى جعل إيه.....  
حروح وحدي و خلاص...."

وكان يلزم الكلمتين دول أن أضع على وجهي "وش التأثر" بتاع أمينة رزق...

وكان رد الفعل من جانب توتا، أن تقمصت دور التضحية :

- "ماشي يا مامي...حروح معاكي عشان مسيبيكيش وحدك...."

ونجحت الخطة!!!!!!



الكابوس



استيقظت من نومي على هزات متتالية من زوجي: "أصحي أصحي....خدي  
بوء مية"

نظرت له بتعجب وأنا أنظر في الساعة: "بوء ميه ؟؟؟!!!! الساعة تلاته  
الفجر، الراجل اتجنن يا ولداه...!!!!"

المهم شريت بوء الميه وأنا أنظر له نظرات نارية، ولكنه نظر إلي وبراءة  
الأطفال في عينيه: "خير؟؟؟"

- "خير !!! بقى يا راجل مصحيني الساعة تلاته الفجر عشان تسألني  
خير؟؟؟ خير يا سيدي...بس هو إيه بقى اللي خير....؟؟؟"

- "يا حبيبي إنتي كنت عماله تصرخي وانتي نايمة وتقولي لا ..لا .... لا  
فمهنش عليا أسيبك كده نايمة وكابوس راكب على نفسك"

"كابوس ...؟ كابوس...؟؟؟" جلست أعصر في مخي عشان أتذكر هذا  
الكابوس وأخرجه من عقلي الباطن كما قال الدكتور في التلفزيون "أي  
كابوس هو مشكلة مخزنة في العقل وتخرج خلال النوم ومن الأفضل  
التعامل مع الكابوس على الفور حتى يخرج من عقلنا الباطن"

و جلست أفكر و افكر حتى وجدددددددددددددددددتها ..... "افتكرت  
افتكرت يا حبيبي، بس اتاربه كابوس فظيع....أل خير اللهم اجعله خير،  
حلمت إن إجازة سيوة مع توتا بعد يومين....رجعت منها وأنا شعري  
ضارب قطنة بيضا و ماشية أكلم نفسي"

- "لا يا حبيبي وانتي الصادقة بعد أسبوع"  
- "بعد أسبوع...على طول كده...إلا يا حبيبي لو رجعت في كلامي يبقى  
شكلي وحش...؟"

أجابني وابتسامة شماتة تقفز من عينيه "لا ، ولا وحش ولا حاجة.. بس  
أنا قلت لك من الأول ما بلاها الرحلة دي أنتي مش أدها..."

- "لا و ألف لا...أدها ونص...بس إنت عارف الحر في سيوة عامل إيه و الدبان والذي منه...وبعدين أمى بتحب تاخذ فريق الأحفاد عندها بعد الامتحانات عشان تفك عنهم وعني أنا و اختي وطبعاً حتزعل لو كسرت لها عادة..."

- "طب بدمتك...حتزعل برضه ولا إنتي اللي كنتي حتفيسي هناك... فين خططتك وشعاراتك وقراراتك ، فين لازم أعلم البنات البعد عن التكنولوجيا ويجب محاربة حزب (الاناتيخ الالكترونيين) وكل الكلام اللي تحفتينا بيه من يوم جلستكم الميمونة لما الكهريا قطعت."  
وهنا بدأت كرامتي بتنقح عليا ولكن الاعتراف بالحق فضيلة... "لك حق... أرفع الراية البيضاء...وحتدي مش حقدر أبداً...ماتيجي نقوم بالرحلة دي سوا كلنا أنا وأنت والبنات...."

- "أنا وأنت والبنات في سيوة؟...يا جماله...ومالها التكنولوجيا مالها...؟!يا ستي نامي و سيبك...بكره الزمن يعلمهم..."  
- "طيب و توتا...ديه عملت حسابها و قالت لكل أصحابها...دي حتعملها مندبة..."

- "مندبة أيه دي ما حتصدق...يا ستي نامي و يبقى الصبح يحلها الحلال..."

و جاء الصبح و أنا بضرب أسداس في أخماس: "حقول أيه للبنات... حطلع قدامهم عيلة بترجع في كلامها ولا أترف لهم بخطي والسلام..."  
اقول الحقيقة و خلاص: "بس المشكلة إنهم مش حيفهموا دوافع خطي أبدا...سوف أكون بالنسبة لهم كأني مرات أبو سندريلا اللي كنت عاوزه أخذ اختهم الصحراء عشان استفرد بها"  
ولسه بقولهم "صباح الخير يا حبايبي الحلويين" إلا ودق جرس التليفون:

”مامى....مامى ، نانا على التليفون...“.

-”صباح الخير يا أمي...خير؟ مال صوتك...؟ فيه إيه...؟“

-”ابوكي لسه سامع في النشرة إن فيه موجة شديدة الحرارة الأسبوع الجاي و عواصف رملية.... محبكتش يعني عشان تنفذي اللي في دماغك، تروحي تتشحططي انتي وبتتك في الصحرا....“

وهنا كانت فرصة عظيمة و جاءت لي على طبق من فضة....لا فضة إيه ده طبق من ذهب...وكالعادة كانت ردارات البنات تشتغل بأقصى قوة لتلتقط ما يستطيعونه من البث التليفوني بيبي وبين جدتهم....فهم في انتظار إشارة بدء المعسكر الصيفي لهم وأولاد خالتهم عند نانا وجدو.... وبالفعل التقطت راداراتهم المكاملة من أولها حتى آخرها عندما قلت لأمي وأنا وجهي يقطر حزنا بينما كان قلبي يرقص فرحا:

-”ياه يا أمي، دي كده رحلة سيوة لازم تتأجل....يلا خيرها في غيرها.. لما أروح أقول لتوتا والبنات...ده أكيد توتا حتفرح أوي وخصوصا إنها كانت هتسافر معايا وهي عاصرة على نفسها لمونة“

ولسه ملحقتش أحط السماعة إلا ولقيت لولا و موما بيرقصوا من الفرح....فهما من الأول مكنوش عاوزنا نسافرنوسيبهم.

”الحرو العواصف....يا....يا.... يعيش، يا....يعيش...“، ولكن نظرة سريعة لوجه توتا الحزين كان كافي أن يصيبني بالحيرة....

-”إيه دا يا توتا...أنا قلت حتقلبيها فرح لما تعرفي إن الرحلة أتلغت...إيه النكد ده...؟“

نظرت البنات لبعضهن و ساد صمت طويل ثم...

-”أصلي يا مامي مكنتش عاوزه أزعلك وأقولك إنهم في الجامعة ضحكوا عليك والفتندق الخمس نجوم اللي قالولك عنه ده تقريبا عتش اقرب

للخيام..."

- "عشش و خيام...!عرفتي منين...؟"

- "التكنولوجيا الحديثة يا مامي...النت طبعا...وأنا بصراحة لما عرفت كنت مترددة إني أقولك إزاي لأنني كان نفسي أجرب رحلة المخيمات زي سلمية صحبتي ،دي بتقول إنها تحفة....أسفة إني خبيت عليكى ."  
طبعا قعدت اليوم كله بكلم نفسي و بضرب كف على كف... صحيح  
جيل عفاريت ،بقى تيجي تصيده يصيدك.....

أنا اللي  
جبت ده كله تنفسي



“أنا اللي جبت ده كله لنفسى”

إحدى جملي المعتادة التي تأتي دوما على لساني كلما طلّعت واحدة من بناتي عيني في خروجة أو مطعم أو سوپرماركت....  
وطبعا جملة كهذه تكون دوما مصحوبة بابتسامة صفراء ونبرة تهديد و نظرة “أصبروا عليا لما نوصل البيت”....

ولكن هذه المرة تركت استخدامها لوالدي- الذي كان دوما يوبخي أنا أو أختي عندما نقسو على أولادنا بعد ما يكونوا طلّعوا روحنا – ولكن هذه المرة بعدما فاض به الكيل ، قال لي هامسا “ربنا يكون في عونك”...  
أما كيف ؟ ولماذا ؟ فهذه قصة تانية... قصة بدأت بإيجار الأرض التي ورثها أبويا عن جدي و يذهب كل سنة في الصيف لتحصيل إيجار السنة ثم يأخذنا جميعا لسيدي عبد الرحمن كعادته منذ كنا أطفال أنا وأختي واستمرت هذه العادة بعد زواجنا....وبنفس الترتيب... يأخذ القطار للبلد...يأتي بالإيجار...يرجع للقاهرة يؤكد الحجوزات مع الفندق والأتوبيس الذي يستأجره ليصطحبنا لهنالك....ثم ننتقل جميعا لنقضي إجازتنا المعتادة والتي نحتاج جميعا بعدها فترة نقاهة من مشاكل و دوشة ولادنا أنا وأختي.

ولكن الترتيب تغيرهذه السنة....فزوجي اشترى سيارة جديدة ... ونتج عن ذلك إنه عرض على والدي أن يأخذه بنفسه للبلد بالسيارة الجديدة ولم تفلح محاولات أبي معه لأقناعه بتركه براحته في القطار.

-“يا عمي متخفش دي عربية جديدة يعني صاروخ...نروح “صدة ردة” بدل بهدلة ورجرجة القطورات...”

-“يا ابني أنا متعود على الرجرجه دي من زمان...وأنت عارف إن ركوب القطارات عندي مزاج .... خليك أنت بس مرتاح...”

مناقشة استمرت طويلا نتج عنها أن والدي استسلم ، خصوصا إن البنات شبطوا في أبوهم وجدهم زي اللزقة الإنجليزي...وكان أصدرا والدي مرسوماً أبوياً نفذته شفقة وخوفا عليه...

“إنتي طبعا جاية معنا...عشان البنات... ”

الثامنة صباحا كان والدي يقف على باب شقتنا...“أنا قلت أجيلكم تمام بنفسي أحسن أنا عارف حبالكم طويلة ولو سبتكم حتيجولي الضهر...”  
-“ احنا جاهزين يا عمي ...عشر دقائق و نطلق ...عقبال ماتشرب قهوتك.....”

والعشر دقائق جرت وراها ربع ساعة في نص ساعة...وفي النهاية وقف والدي مقررا إنه سينطلق بعد خمس دقائق...بالقطار...بالتوك توك... بالسيارة...بأي حاجة...إن شالله على ظهر جمل.. المهم إنه لن ينتظر لحظة أخرى....

-“ مهو مش معقوله يعني نقوم الضهر...لو كنتم سيبتوني أخذ قطر الساعة سابعة كان زماني راجع دلوقتي....”

وكانت هذه هي الجملة الفيئالي على رأي بتوع السينما...قام بعدها زوجي بإكمال ربط حذائه في العربية وتوتا نزلت منكوشة كأنها ضاربة شعرها في الخلاط...ولكن كله يهون عشان جدو ميزعلش....

ولسه حنبداً الطريق الزراعي إلا وظهرت في الأفق بوادر معركة... مقدمات أعرفها جيدا... بدأت بجملة من “فيلسوفة العيلة” الست لولا التي أنتهزتها الفرصة عشان تضرب فينا زومبة صغيرة...

-“ شفت بقه يا جدو...هما على كدا على طول...كل مشوارنروحه نبقى أنا وموما الغلبانة جاهزين ونقعد بالساعات عقبال ما بابا ومامى يجهزوا وده طبعا غير توتا وسكاعتها...”

- "انا سكة... ماشي أنا حوريكي بس لما نوصل"  
 نظرة من نظرات توتا النارية كانت كفيلة بإخراص لولا... فمعنى تلك  
 النظرة معروف لها... توتا حتورها النجوم في عز الضهر...  
 - "بس خلاص كده يا بنات... متصدعوش جدكم... دي أول مرة يطلع  
 معانا البلد بالعربية..."  
 - "سيبي البنات براحتهم... يعني هما عملوا إيه.. أهم حيتناقروا شوية...  
 زي ما انتي وأختك ياما أتناقرتم..."  
 وطبعاً الكلمتين دول كانوا كافرين أن يجعلوا السعادة تقفز من عيني توتا  
 ولولا اللي أخذوا الكارت الأبيض من جدهم... فأنطلقوا....  
 - "هيه... هيه... يعيش جدو يعيش"  
 صرخات السعادة التي انطلقت من توتا ولولا كانت كفيلة أن توقظ موما  
 اللي كانت يدوبك حتروح في النوم... وبدأنا... موما زن... زن... زن...  
 - "مامى سكتهم أنا موش عارفه أنا... هي... هي... هي..."  
 - "ليه أحنأ في البيت ولا إيه... يا شيخه اتلهي..."  
 - "عيب يا لولا الألفاظ دي... وبعدين وطى صوتك إنتي مش شايفه إنى  
 بتكلم في التليفون.... هكذا رد عليها أبوها.  
 بمنتهى البراءة ذكرت موما والدها إن التكلم في المحمول ممنوع وذكرته  
 بالعسكري الذي أعطاه ورقة الأسبوع اللي فاتت عشان كان بيتكلم في  
 موبيله...  
 وتدخل والدي:  
 - "بس يا ولاد متلبخوش أبوكم... دي أكيد مكاملة مهمة، دقائق و  
 حيخلصها"  
 طبعاً لم يفهم والدي مغزى النظرات والابتسامات اللي تبادلناها أنا و

الأولاد ، إلا عندما أستمرت المكاملة لأكثر من ربع ساعة ... والتي كانت كفيلة أن توتر والدي ...

- "يا ابني في عرضك أقفل البتاع ده...يا ابني دا طريق سريع مينفعش تتكلم وتسوق في نفس الوقت...يا ابني ...يا ابني.."

وكانت اجابته هي نفسها كل مرة... "حاضر يا عمي...كلمتين وأقفل..." لم يكن والدي المسكين... يعلم أن تحدث زوجي في المحمول هو أقل مشاكله في هذه الرحلة...فسرعان ما بدأت الجولة الثانية بين توتا ولولا... بدأتها توتا بسخرية مستفزة للولا فردت عليها لولا بكتف قانوني...لحقها توتا "بزعدة قوية " بكوعها في بطنها ...تبعها كالعادة تأوهات وصرخات من لولا أدت إلى وصلة من الزن المتين من موما لأنها استيقظت من نومها مفزوعة...وطبعا تهديد ووعيد مني إني حورهم لما نرجع البيت ....

- "يا مامى أنا ذنبي إيه...هي السبب...هي اللي بدأت"

- "أنا اللي بدأت يا كدابه...مش انتي اللي ضربتيني كتف..."

- "متقوليش كدابه...سامع يا جدو توتا بتقول عليا إيه..."

- "عيب يا توتا تقولي لأختك كده..."

- "طبعا يا جدو حتاخذ صفها زي كل مرة..."

- "أنا باخد صفها...شكرا يا ست توتا...مهو أنا اللي جبت ده كله لنفسى..."

كان مالها رجرة القطر كان مالها...؟! "

مناقشة استمرت قرب حدود القرية لم يقطعها إلا صوت كلاكس جرار زراعي يريد أن يمر من جانبنا وزوجي مشغول في تهدئة والدي الذي فقد أعصابه جراء هذه المناقشة بينه وبين البنات والتي أنضمت لها موما بعدما فشلت في النوم من أصوات أختها....

- "معلش يا عبي مهوانت عارفهم...زي الديوك..حاجة فظيعة..."  
و طبعاً فرصة وجاتلي " شفت يا بابا أنا طول النهار في إيه؟... وبعدين  
إنت وأمي تقولولي هدي نفسك إنتي طول النهار متعصبه على العيال كده  
ليه...؟؟؟ "

وكان رده هامسا ولكنه كان كافيا أن يرد لي كرامتي:

- "ربنا يكون في عونك يا بنتي...."

وما إن لمست قدم أبي أرض البلد إلا و أقسم أن يأخذ القطار للرجوع  
للقاهرة...وتاني يوم وبعدهما شرحت لأمي السبب الذي من أجله رجع  
والدي بالقطار بدلا من سيارتنا إذ بأمي تضحك وتقول لي إنه قضى ليلته  
يحدث نفسه:

- "أنا اللي جبت ده كله لنفسي....."

ومازلنا كلما اجتمعنا أنا وأختي مع والدي ووالدتي ونقول كلمة السر " أنا  
الي جبت ده كله لنفسي " ونضحك كلنا ملء قلوبنا.....



فستان الحفلة



في العادة الجوفي منزلنا حار جاف طول الوقت...ولكن في بعض الأحيان تبدأ السحب في التجمع في سماء الشقة و الدنيا تغيم وهنا تبدأ بوادر العواصف و الأمطار و التي تبدأ عامة بمكالمة هامسة لست الكل "نانا" كما يناديها الأولاد...تليها إبتسامة ذات مغزى وكلمتين: "كلي نانا بسرعة يا مامى"...الكلمتين دول كافيتين إنهم "يكركبوا بطني"...آخر مرة كلمت فيها نانا بسرعة ، كانت على أثر مكالمة هامسة عندما رفضت إن تعزم توتا صديقاتها عندنا في البيت بمناسبة نهاية السنة وكانت... طبعا رضخت للأمر المباشر من ست الحبايب التي قالت لي وهي تخيرنا: "يا إما تعملها عندك يا إما جعلها عندي وانتي تشيلي على ضميرك تعبي وخلق أبوك اللي حيضيق "

وبعد عدد من المحاولات لإقناعها إن المشكلة مش إن توتا عاوزه تعزم بتاع عشرة من صديقاتها وإن البيت مش حيقضي هذا العدد، إنما المشكلة الأكبر إن باقي كتاكيتي كل واحدة حتقولك "اشمعى توتا أنا كمان عاوزه أعزم اصحابي" وطبعا مهما قلت في النهاية بنقذ الأوامر، فالدنيا دواره على رأي ست الكل ولو أنا مسمعتش كلام أمي النهارده بكره بناتي مش حيسمعوا كلامي "آل يعني هما بيسمعوه دلوقتي لما حيسمعوه لما يكبروا"....

طبعا المرة دي وانا برد على المكالمة كان إيدي على قلبي: "يا ترى يا توتا بتجهزيلي إيه المرة دي...مهو أنا عارفاكي الإجازة بدأت وفضتيلي "

- "بصي بقه البننت معزومة في خطوبة أخت صحبتها...والخطوبة معمولة في فندق 5 نجوم ودي أول خروجة لبنتك... "

ثم فترة من السكون...هذه الهدوء الذى يسبق العاصفة...أنا عارفاه جيداً...

-”من الأخر كده ، البننت عاوزه فستان جديد تروح به الخطوبة وهي قالتلي إنك راسك وألف سيف تلبسها الفستان اللي لبسته في خطوبة ابن خالة جوزك....”

-”و فيها إيه يا أمي ،مهو حرام أشتريها فستان وهي لسه عندها واحد مابقلوش سنة و متلبس إلا مرة واحدة”

-”إنتي نسيتي لما كنت أكبر منها سنتين تلاته و كنت عاوزه فستان جديد لخطوبة صحبتك داليا ؟ ابوك إداني الفلوس و نزلنا جنبناه علطول.... حرام عليكى الذل و نشفان الريق ده للبننت”

و عند هذه النقطة المناقشة انتهت و صدر مرسوم من أبويا إني أنزل أجيب للبننت الفستان اللي هي عاوزاه وأعتبره هدية منه لها...

وكانت... كل محلاتك يا مهندسين كسرت و رانا قتل ..دا غير الزغاريد التي كانت تنطلق من كل محل نخرج منه بعد ما توتا تطلع كل الفساتين اللي في المحل و تقيسها....لا ده وحش...دا بلدي...دا طويل..دا قصير....دا متخني...دا غير بقه الأخت موما اللي فيصت من أول محل و ضربت زنه و دمعتين بتوع النوم و طبعا رسيت إني لفحتها على قلبي في يجي خمستاشر محل...وكالعادة الخدمات التي كانت تتبرع بها لولا لمساعدة أختها كانت غير مقبولة من توتا وكادت تتسبب في أزمة دولية تحتاج لقوات أمن مركزي لفضها...

-”بصي يا توتا الفستان التحفة ده...”

-”ده تحفه...؟!ده يقرف الكلب... إيه اللي فهمك إنتي في الموضة ؟ يا شيخة خدي جنب ولا روجي اركني جنب موما على الكرسي هناك...هاه يا مامي إيه رأيك في اللي أنا لبساه...؟؟؟

-”حلو أوي يا حبيبتى...إنما حتلبسي معاه جونلة ولا بنطلون...؟”

وفجأة الألقي توتا بتضحك كما لم تضحك منذ سنوات"جونلة ولا بنطلون.....ده ولا مؤاخذه يا مامي فستان ..."

"فستان إيه دا يا حبيبتي دا اللي واصل لفوق ركبتك بشربين....؟"

"يا مامي إنتي قديمة أوي....البنات كلها بتلبس كده...."

"انسي ولو عملي قرد ولأ عجبن الفلاحة حتى.... أبداً"

انا قلت الكلمتين دول وأنا لافه وشى عشان اتفادى النظرات النارية و الأفأفه، فماكنتش طالبة إننا نفرج علينا المحل....وطبعا كالعادة تليفون لنانا....شرح للموضوع....كبسة كبيرة...فلأول مرة ست الكل تنصفي ومانجيش على أول فرحة...."قصيرلاً يا توتا..."

وطبعا كان معنى رفضي شبه الفستان ده إن رحلة البحث عن فستان لن تنتهي بعد....ولكن القدر كان رءوفا بي...البائعة التي شاركتنا رحلة الشقاء في هذا المحل..رأفت بحالي غالبا وبحال موما النايمة ولولا اللي رعبت في الأرض ونضفت لهم أرضية المحل بنطلونها الأبيض....

"هو فيه بضاعة لسه واصله النهارده ولسه متسعرتش ولكن عشان خاطر عيون ماما حطعلك كام فستان....بس يارب تعجبك حاجه منهم..."

وعلى نظام أرشميدس "وجدتها...وجدتها..." وجدت توتا اخيرا الفستان الذي في خيالها....طبعا صرخات الفرحة انطلقت من لولا اللي كانت خلاص حنطق من الزهق والبائعة الغلبانه التي لا يزال أمامها عمل شاق في تعليق المائة فستان اللي قاستهم الست توتا....

"أمال لو كانت بتشتري فستان الفرحة كانت عملت إيه في حضرتك....؟!ربنا يكون في عونك...."

جملة قالتها البائعة وأنا أعطها البقشيش الكبير، الذي يعتبر في حالتنا

هذه بدل مخاطر مهنة...وخيل لي أني سمعت صوت زغاريد في المحل و  
قلل بتترزع في الأرض...وبصراحة دي أقل حاجة تتعمل بعد اللي شافوه  
مننا في المحل ده....

ولسه بنتنفس الصعداء أنا ولولا وبقولهم يلا نأكل أيس كريم احتفالاً  
بانتهاء معاناتنا في رحلة البحث عن فستان إلا وتوتارمت علينا قنبلة من  
العيار الثقيل...

“لسه الجزمة والشنطة.....”

عك دوت كوم



“الدنيا ريشة في هوا.....طائرا من غير جناحين....لالالام....إحنا النهارده  
سوا وبكرة.....”

ولم يتسنى للأخ سعد عبد الوهاب أن ينهي أغنيته الشهيرة.... عندما  
فاجأني التتار بهجمة مباغطة لم اعمل لها حساب ، تأكدت من الجريدة  
أن اليوم هو الجمعة بالفعل....إذاً ماذا هن فاعلات ، حبيبات قلبي في  
هذه الساعة المبكرة....؟؟؟ فالعادة تقتضي أن يستيقظن من النوم  
متأخرات.....قرصت نفسي لأتأكد....فهذا اليوم أنتظره طوال الأسبوع.....  
أنا وحدي مع نجوم إف إم والجريدة....البنات بياكلوا رز مع الملايكة وأنا  
في التمام.....بس شكلها الجمعة دي انضّرت....

-“خير يا كتاكيتي الحلويين...؟؟؟” سألت وأنا قلبي يرتجف من القلق  
فتجمّعهن المبكر هكذا على” نظام كلنا إيد واحدة يا بهجت” دائماً ما  
يقلقني....فأخر تجمع كهذا كلفني مبلغ وقدره .... عزومة غذاء في المطعم  
الجديد اللي فتح جنب البيت عندنا بمناسبة عيد ميلاد زوجي..... طبعاً  
مش خسارة فيه .....!!!!

قلت محدثة نفسي :”لا وألف لا اجمدي هذه المرة... لا تراجع و لا  
استسلام.....بس متستعجلش الأحداث يمكن جاين يصبحوا عليكى بلا  
غرض في نفس يعقوب ، ولأً مثلاً تكون غزالة توتا رايقة وجاية تسألني هي  
وأخواتها أظفراًيه؟....زى ما بيعملوا يوم عيد الأم.....”

- “صباح الخير يا مامى يا حبيبتنا .... إنت عارفه النهارده إيه.... النهارده  
الجمعة.....احلى يوم في الأسبوع....”وقفت توتا أمامى وهي ممسكة بيد  
لولا وموما وبراءة الأطفال في عيونهن....  
مقدمة كهذه كانت كفيلة بقلبي أن يقع في رجلي .

“بقى توتا ولولا وموما متجمعين على الصبح كده.....ولا خناقة ولا بوز و

لا تكشيرة.....أكد ناوين لي على نية....".

قالت لولا وهي تمسح على رأسي:

"إيه يا مامي يا حبيبي، بتكلي نفسك زي أم سلامة مرات البواب....ها..  
ها..ها...".

"بكلم نفسي....؟؟ دي أقل حاجة يا حبيبي وأنا شايفاكم داخلين عليا  
كده بريطة المعلم....خير...؟ خير...؟"

"متخافيش يا مامي يا حبيبي...." قالت لي موما وهي تسرع للجلوس في  
حجري

"دي توتا بتقول إنك حتطلبي النهارده أكل من بره...."

"أكل إيه يا توتا اللي بتقولي عليه...؟؟"

"دليفري يا مامي....مش إنتي وعدتيني إني لما أجيب درجة جيدة حتنفذي  
لي اللي أنا عاوزاه....أنا عاوزه النهارده دليفري...."

"توتا حبيبي مش إحنا أتفقنا من يوم ما موما جاتلها النزلة المعوية، إننا  
حنبطل لفترة أكل بره...؟؟؟"

"خلاص يا مامي...نطلب أنا ولولا بس..."

وهنا تدخلت موما بتكشيرة صغنوننة: "مليس دعوة يا مامي لوهما طلبوا  
من بره أنا كمان حأطلب....اشمعنا هما"

قذيفة مباشرة خرجت من فم توتا مباشرة لأذن موما:

"إنتي مالك بيا يا موما أنا كبيرة وموش عيانة....خليكي إنتي في حالك...  
يا مامي لو سمحتي أنا زهقت من أكل البيت وعاوزه أطلب من بره، أي  
حاجة...أي حاجة..."

تدخلت لولا التي كانت تتابع الموقف من بعيد لبعيد، يهدوء "إيه رأيكم أنا  
عندي حل حيدسطنا كلنا....مامي إحنا زهقنا من الأكل بتاع كل يوم، إيه

رأيك تعلمي لنا أكله مختلفة النهارده ... ”  
وجاء رأي لولا نجدة لى من إلحاح توتا وزن موما ”موافقة يا بنات...  
عاوزين تاكله إيه ؟“  
-”أى حاجة سهلة ، إنشالله كشرى، بس على شرط يا مامي إننا كلنا  
نطبخها سوا....“  
أخ يا لولا يا سوسة ، صحيح اللي تحسبه موسى يطلع فرعون....  
-”ندخل المطبخ سوا....؟ دي حتبقى عكة مش أكله...“  
-”بما إني حطعتها من الكمبيوتر.....؟! تبقى عكة دوت كم يا مامى “  
بعد مرور عدة ساعات ....وعند دخول بابا البيت ....  
-”إيه الريحة الحلوة دي يا جماعة....؟“  
-”دي يا بابا أكلة دوت كوم....“قالت له لولا ضاحكة  
وأكملت موما:  
-”توتا هي اللي طلعتها من الكمبيوتر يا بابا “  
-”يا جماعة أنا ميت من الجوع..يلا...الريحة دي أنا عارفها ؟ ديهههههههه...“  
أجاب الجميع في نفس واحد:  
”كشــــرى“  
ولكن ما كاد زوجى يضع أول ملعقة في فمه حتى ضحك ونظر لهم..  
-”دي فعلا عكة أخ قصدي أكلة دوت كوم...إيه الصلصة المسكرة  
ديه...!!!“  
-”مسكرة إيه يا بابي، دي صلصة صيني وهي بتبقى كده مسكرة.... وإحنا  
قلنا نعملها مع الكشري من باب التغير والإبداع....“  
واخذ الجميع في الضحك .... والأكل طبعا بما إنه كان الطعام الوحيد  
المتاح....



من خرج

من داره اتقل مقداره



-”ألو...ألو...هاااااام....مين....أيوه.. صباح الخير يا حماتي...لأ، صاحية...  
أهي مع حضرتك...”

أنا كنت نائمة ولكن ما إن سمعت كلمة حماتي حتي تنهت كل حواسي  
التي كانت تشاركني أحلى نومة....

ناولني زوجي السماعة وهو مغمض العينين...

ضربت عيني ناحية المنبه إذ بي أفوجاً بأن الساعة لا تزال الثامنة  
”الساعة ثمانية ويوم جمعة.....!!!“

انتفضت خارج السرير وبدأت ألبس ملابس بيدي وأوقظ زوجي باليد  
الأخرى...” أمي مالك إنتي تعبانه...؟؟بابا تعبان...؟؟ إحنا حنلبس و  
جاينلكم حالا....“

-”إيه يا بنتي ؟ فيه إيه ؟ اهدي شوية...إحنا تمام..“

-”تمام وأهدى !!“ بقدر ما طمأننتني كلمات أمي إلا أن الفأر لعب في عبي...  
فأمي تعرف إن يوم الجمعة يعتبر أهم يوم من أيام الأسبوع كلها بالنسبة  
لي ومن أهم طقوسه هو قفل جرس المنبه والنوم لوقت متأخر، فهذا هو  
اليوم الذي أخذ فيه هدنة من المعركة الصباحية بيني وبين الأولاد حتى  
يجهزوا قبل ما سواق الأتوبيس يصحّي المنطقة كلها من الكلاكسات...  
ولكن ”ليس كل ما يتمناه المرء يدركه“... فالمكاملة الصباحية من ست  
الجابيب ضربت لي كل خططي ليوم الجمعة... يلامش مشكلة دي برضه  
ست الكل...يمكن زهقانه وعاوزة تتفك شوية...ولسه ملحقتش أوصل  
المطبخ لتحضير فنجان قهوة يفوقني إلا ولقيت قذيفة (جو-جو) تخرج  
من السماعة في صرصور ودني مباشرة :

-”إنتي بقه حضرتك كنتي نايمة ومعرفتيش إن ابن أختك خد ميدالية

لتفوقه في لعبة الجودو وكمان حزام مش عارفه لونه إيه بنفسجي  
ولا بني؟”

أحبتهما وأنا لسه عيني مفتحتش كويس ولا كان أصلامخي فاق من النوم:

”طب كويس إن حضرتك قلتيلي ، حاكلمه على طول أبارك له....”

”تباركي له....اسمها تباركي لأختك اللي مطحونه معاه راичه جاية تودي

تمرين وتجييب من تمرين...”

”حاضر يا ست الكل حأبارك لها وحأبعت لها كمان بوكيه ورد”

”تباركلها إيه وورد إيه...هويعني أنا كنت بكلمك الساعة ثمانية الصبح

وبصحيكي عشان ورد ومباركة....؟”

نبرة الغضب والسخرية التي أستشفيتهما من بين كلمات أمي حدثاني أن

الموضوع فيه ’إن’ وشكله كده داخل كمان على ’كان وأخواتها’.

طبعاً أنا قلبي وقع في ركي، وقرور الاستشعار عندي شعرت بتسونامي

قادم في الطريق:

”روقي بس يا ست الكل ، هو فيه حد يزعل وهو سامع أخبار حلوة كده

على الصبح...”

”أروق إيه وبتاع إيه...أجيب منين أنا الروقان وانتي وعيالك قاعدين

طول النهار في البيت زي البطة وعيالها...يدوبك ييجوا من المدرسة و

مذاكرة وتلفزيون وأكل ونوم...”

”مهو يا أمي اليوم 24 ساعة بس...يعني يا دوبك متفصل تمام على قد

المذاكرة والأكل والمدرسة والنوم....”

”مهبي كل خلق الله يومهم 24 ساعة و برضه بيعملوا كل ده وعيالهم

بيلعبوا رياضة....يا بنتي في عرضك قومي فوق كده و خدي العيال

النادي، أشبكيهم في أي رياضة....والنهاره الجمعة يعني ملكيش أي



دقيقتين ولقيت موما افتتحت في البكاء والصراخ... "أخواتي اتخطفوا..

توتا ولولا ضاعوا.... هيئ هيئ هيئ...."

- "هس يا موما... وطي صوتك حتلي علينا الناس..."

- "اسكت إزاي وأنا أخواتي راحوا..."

- "راحوا إيه يا بنتي هو إحنا سبناهم في محطة مصر..."

طبعا صوت بكاء موما مع أداء فيروز الدراماتيكي لموا علينا أعضاء

النادي و الأمن وقامت الدنيا ولم تقعد وكان ناقص يطلبوا بوليس

النجدة... وشوية مدير النادي وصل: "هدي نفسك يا مدام مفيش حد

اتخطف من النادي قبل كده..."

طبعا أنا كان نفسي أضحك من شكله وشكل الناس اللي أتلمت دى...

توتا ولولا دول يخطفوا بلد ، "يا فندم مفيش مشكلة إن شاء الله يظهروا

دلوقتي... أحنا قفلنا بوابات النادي ومفيش حد حيخرج بأي طفل إلا لما

نلاقي ولادك..."

حاولت أفهم الجميع إن اللي بيتكلموا عنهم دول شحطتين كبار

ميتخطفوش ، ولكن منظر موما و دمعها في عينها لم يعط الفرصة

لأحد ليسمعني... واستمر الوضع بهذا الشكل الجنوني حتى لمحت الأختين

الحلويين جايين يتمخضروا من بعيد وكل واحدة ماسكة في إيدها طبق

جاتوه...

وبعد المباركات والتهاني من الأعضاء بعودة بناتي سالمات غانمات

والنظرات النارية من مدير النادي و الأمن ، اللي مصاربنهم كركبت من

القلق على سمعة النادي... خدت ديلي في سناني وبناتي في إيدي وجري

على البيت وأنا طول السكة بترحم على جدتي وأنا اتذكرها وهي تقول

:"من خرج من داره اتقل مقداره ...."

يا فرحة ما تمت



”شم النسيم“ وادي الربيع عاد من تاني “و” فريد الأطرش “ ثلاثي لا يفترق  
هما والفسيح والرنجة والبصل الأخضر.

التجهيزات لشم النسيم تبدأ عندنا بشراء الرنجة والفسيح “ قبل  
الهنا بسنة “ لأن دي من نصائح بنت خالة بنت عم جوزي “الفسيح و  
الرنجة لازم ييجو بدري بدري قبل ما الناس تنقي وتفحص “ وطبعا هذه  
النصيحة يتعامل معها كالوصية غير قابلة للتغير أو الإلغاء.... ثم تبدأ  
المرحلة الثانية لتجهيزات شم النسيم.....

“حزوح فين السنة دي....” معضلة كل سنة....وكعادتنا الأسرية نضع  
كل الأماكن ونبداً في تفتيتها....جنينة الحيوانات....زحمة....القناطر...  
بعيد....الفنادق عاوزة حجز....حديقة المطار خلاص راحت عليها وتقريبا  
منعوا الجلوس فيها....الحدائق العامة زحمة....الهرم... زحمة وممنوع  
الأكل....

ولكن السنة دي حصلت معجزة....استطعنا بعد مداولات و حورات  
كثيرة قهر خوف موما من الماء(وهذا طبعا بعد دروس مكثفة الصيف  
الماضي في حمام سباحة النادي)....قرار نهائي سنأخذ مركب في النيل....  
وطبعا صرخات الفرحة انطلقت من منزلنا كأن توتا طلعت الأولى في  
الثانوية العامة....مركب في النيل.... أخيراً....

وقبل شم النسيم بأيام اتفق زوجي مع مراكي و استأذنتنا توتا أن  
تصطحب معها صديقة ألمانية تأخذ معها دروس الإنجليزي في المعهد  
البريطاني....طبعا لولا كالعادة قلبت بوزها و ملأت تأففاتها المنزل لمدة  
يومين....

-”يعني كان حبكت يا توتا تجيلنا صحبتك دي....”

- "وفيهما إيه يا ست لولا... هو إنتي حتشليها فوق راسك.... حاجة غريبة بجد..."

- "أنا اللي غريبة... دي خروجة عائلية إيش حشر صاحبك فيها... أوف... أوف..."

- "مامى... مامى... هاهاها... تعالي شوفي فيلسوفة الغبرة وأفكارها المدمرة... دي عاوزه تضرب السياحة في مصر...  
طبعا بعد نظرات نارية والوش الجبس المعتاد والابتسامة الساخرة...  
ردت لولا:

- "ليه هي صحبتك وزيرة السياحة بتاعت ألمانيا وإحنا مش عارفين..."  
- "هاها... إيه الظرف ده... لا يا فالحة.. دا اتفاق عملناه إحنا الطلبة المصريين في المعهد إن كل واحد ياخذ في شم النسيم واحد من المدرسين وأول الطلبة الأجانب عشان نفرجهم أماكن كتيرة في مصر و بكده هما حبيقوا سفراء للسياحة في مصر عند أصحابهم الأجانب جوه وبره مصر... شفقي بقه يا ذكية..."

وكانت نظرة الامتعاض على وجه لولا خير دليل لتوتا إنها لم تستوعب كلمة مما قالته... وطبعا هذه المناقشة كانت مقدمة لي عما ستكون عليه الرحلة النيلية المنتظرة... "يلا.. أهويوم ويعدي..."  
وها قد جاء... الساعة الخامسة والنصف جرس تليفون توتا يليه برع ساعة جرس الباب... "أنيئا وصلت يا مامى..."

- "أنيئا وصلت!!!!... أنيئا مين!!!!... هي الساعة كام...؟؟؟..."  
- "بابا... مامى... اصحوا يلا... صاحبة توتا جت... دي حلوة أوي وشعرها أصفر..."

- "ماشي يا رويتر... عشر دقائق... هما اخواتك صحيو...؟؟؟"

- "هاها..إيه يا بابا السؤال دا.... توتا صححتنا كلنا من بدري...يلا بقى  
أصبحوا عشان المركب مستنيانه...."  
قمت من السرير و أنا بقدم رجل و آخر الثانية..وبكلم نفسي كالعادة:  
"يادي الفضيحة...الخواجاية ألمانية ... يعني ولا حنقمها ولا حتفهمنا....  
والإنجليزي بتاعها أكيد مش حيسد معنا..."  
ولكن زوجي العزيز طمني مستخدماً جملي المعتادة وقاللي "أهو يوم  
حيعدي...بالطول ولا بالعرض حيعدي متشليش هم"  
ولكن كالعادة ، جت الحزينة تفرح ملقتلهاش مطرح...يدوبك وصلنا  
مرسى المراكب وطلع بينا " الأسطى سواق المركب " زي ما موما قالت له:  
"لو سمحت سوق بشويش يا أسطى عسان أنا بخاف من الميه...."  
وبعد أن ترجمت توتا الكلمتين دول لأنيتا قعدنا كلنا نضحك ونصفق مع  
الأغنية الشغالة في الكاسيت....شوية وهلت علينا روايح شم النسيم من  
فسيخ ورنجة وبصل أخضر من المراكب اللي حوالينا ورصينا الأكل على  
الترابيزة في نص المركب....وفي ثانية كانت البنات بينطوا من الدور العلوي  
في المركب للدور الأرضي وكلهم شمروا وربعوا في الأرض ولسه حنبدأ  
أكتشفنا إن أنيتا "ياختي عليها" عمالة تبصلنا ولا كأننا التتار....وطبعا  
بعد مشاورات ومداولات و محاولة فاشلة للوصول لترجمة كلمتين "  
فسيخ ورنجه" بأى لغة من اللغات الحاية معرفناش فأختصرناها و  
قللناها "فيش...فيش...أمم..أمم"  
وأكلت و يا ريتها ما أكلت....يا دوبك ساعة و الأخت أنيتا بدأت ترطن  
بالألماني وتعيط وتمسك بطنها...  
بصينا كلنا لبعض....يادي المصيبة...البنت اتسمت من الفسيخ و  
الرنجة....

وكان شم نسيم مبتكر، حيث قضينا في المستشفى جنب أنيتا لحد ما عملولها غسل معدة و خرجونا آخر النهار مع قايمة من المأكولات التي يجب أن تأكلها في الفترة القادمة....بس الحاجة اللي كانت مجنناي إني كلنا كلنا من الفسيخ و الرنجة ...أشمعنا هي اللي تعبت....والإجابة من الدكتور جاءت مصحوبه بضحك هستيري:

- "يا مدام إحنا المصريين معدتنا حديد تهضم الزلط....الفسيخ و الرنجة كانوا تمام هي اللي معدتها متعودة على الخفيف فطبعاً لما أدتها فسيخ و رنجه العملية ضربت معاها...أطمناوا"  
- "نظمن إيه...عاجبك كده يا ست توتا قلنا نشجع السياحة، ادينا ضربناها في مقتل بالرنجة و الفسيخ"

عم شفيق المسكين



أصبحت الابتسامة الصفراء مع التعليق المعهود: "التتار وصلوا" من تقاليد يوم السبت في حياتنا ، حيث يستقبلنا بها عم شفيق جارنا الذي يسكن أسفل شقة والدينا ، ونحن نجرجر أقدامنا أنا و اختي لنواكب قفز الأولاد على درجات السلم في سباقهم المعتاد من أجل كسب مسابقة "من سيقبل نانا وجد وقبل الآخر".... طبعاً كان أول ضحايا هذه المسابقة هو عم شفيق "الوحس" كما أطلقت عليه فيفي أصغر أولاد أختي عندما شخط فيها هي وباقي العصابة وهم بيلعبوا على السلالم....

عندما كنت أشتكي لوالدي من تصرفات عم شفيق مع الأولاد كان يرد علي والضحكة لا تفارق وجهه:

- "ما هو إنتي عارفة إن عمك شفيق طول عمره ظريف وبيحب الأطفال... بس بالنسبة له ولادكم إنتي وأختك دول مش عيال دول عفاريت.... هاهاها.... وبعدين هو متعود طول عمره يطلع يشرب معايا الشاي ساعة المغربية ونلعب لينا دورين طاولة و طبعاً طول ما العفاريت هنا مبيعرفش يرمي زهرتين على بعض...."

وتكون الطامة الكبرى مع بداية الإجازة الصيفية للأولاد فيتم تلقائياً تغيير صفة الأولاد من " تتار إلى هواليك" وعندما أستفسر منه أبي عن معنى كلمة هواليك قال له ضاحكا: " يا سيدي الهواليك هم من يهلكوا أي شيء في طريقهم ، زي أحفادك كده....هههههه".

فمع بداية الإجازة الصيفية يقوم كل من أمي و أبي بمهمة فدائية فيستضيفوا أولادنا الستة مرة واحدة بالرغم من إعتراضي أنا وأختي.... وطبعاً هذا الإعتراض لم يكن سببه إن الأولاد سيوحشونا او أننا لا يغمض لنا جفن وهما بعيد عنا و الكلام الخايب اللي الأمهات اللي في سنة أولى أمومة يقولوه...ولكن سبب الأعتراض كان خوفنا من أننا بعد

الشر «نتيتيم» ونفقد أمانا أو أبونا....

فألست عيال مجتمعين كفيلين إنهم يحرروا فلسطين فما بالكم بعصفوريين كناريا كأمانا وأبيننا.

اليوم كان بداية المعسكر الصيفي عند نانا وجدو وخلال رحلة الصعود لشقة والدينا حدث ما لم نتوقعه ابدا.....هدووووووء.. أين ذهب صوت صراخ الأولاد وهم يتسابقون على درجات السلم.... أين صوت عم شفيق وهو يزرع باب شقته بعد أن يشخط فيهم ....

ولدهشتنا وجدنا عم شفيق يقف مبتسم على باب شقته و يوزع حلويات على الأولاد الذين يقفون ببابه وعلامات التعجب مرسومة على وجوههم....توتا ابنتي و ميمي كبرى بنات أختي لم يبالوا و أكملوا طريقتهم لشقة جدهم حتى يلحقوا المسلسل التركي من بدايته أما موما وفيفي و لولا ودودو ابن أختي و الولد الوحيد في الخمس بنات والي يعتبر أأديهم بشهادة عم شفيق، فأخذوا الشكولاتة من عم شفيق وطيران على فوق... وما ان دخلنا شقتنا حتى اسرع الأولاد ليحكوا لجدهم إن جاره عم شفيق "الوحش" أصبح عم شفيق "الحلو...."

- "بيتهياي يا بابا إن عم شفيق عيان أو فيه حاجة....أتخيل أنه أستقبل الأولاد بابتسامه و حلويات....الموضوع فيه إن ..."

و أكملت كلامي:

- "ماهو أكيد عارف إن الأولاد جاين يعسكروا عندكم بمناسبة نهاية السنة، فقرر أن يغير أسلوبه معاهم...يعني يشتري راحته بشوية حلويات....بس على مين"

وهنا تدخلت لولا ضاحكة:

- "فاكره يا مامي لما حكيتلنا عن كلب جيرانكم اللي كان يهوهو طول الليل

فأتفق باقي الجيران إن كل ليلة يحدفوله أكل فيه منوم عشان يأكله  
وينام فيناموا هما كمان...تفتكريا جدو إن عم شفيق يكون حاطت لنا  
منوم في الحلويات..."

- "حرام عليك يا حبيبة جدو تظلمي الرجل كده...ثم أنتم مش كلاب..  
أنتم عفاريت...يعني المنوم ميعملش حاجة معاكم..."

ولكن إذا عرف السبب بطل العجب...فعم شفيق الوحش تحول  
ما بين ليلة وضحاها لعم شفيق المسكين...ابنه سمير الذي يعيش في  
أمريكا كسر قاعدة كل سنة...فبدلا من أن يبعث لوالده بتذكرة طيران  
ليأتي يمضي معه شهرين الصيف في أمريكا ، قرر أن يأتي هو وعائلته  
لزيارة مصر ، وأتفق هو وزوجته على أن يذهبوا أولا في رحلة بحرية من  
رحلات الصيف المخفضة والتي تجوب موانئ البحر المتوسط وطبعا  
رحلة كهذه لا تحتمل أولاده الأثنين وشقاوتهم... فطلب سمير من عم  
شفيق المسكين(الوحش سابقا) أن يستضيف الولدين عنده خلال مدة  
الرحلة....

بالطبع أشفقنا جميعا على عم شفيق...فأبونا قد حكي لنا كثيرا عن  
أحفاده الذين كانوا يفقدوه صوابه في شهري الصيف حينما كان  
يقضيهما عندهم في أمريكا...حتى إنه السنة الماضية قطع اجازته هناك  
ورجع أسبوعين بدري .. ويكاد والدي يجزم إن اليوم الذي عاد فيه عم  
شفيق من أمريكا رآه يحضن باب شقته ويبوسه واعتقد لولا خشونة  
الركبة كان نزل باس اسفلت الشارع....

- "من الواضح كده إن أحفادي حبايي ملايكة بالمقارنة بأحفاده..."  
- "على كده يا بابا لازم نعلن حالة الطوارئ في العمارة قبل ما هواليك  
عم شفيق يوصلوا..."

- "يا بنتي حرام عليكى....يعني بدل ما تفكري معايا أزاي نساعد عم شفيق ونخفف عنه ،قاعدة تترقي....ده راجل كبيرومعندوش حد يساعده مع أحفاده...."

وأمضى والدي اليومين التالين يفكر و يفكر ،وتم الاتفاق...منزل عم شفيق سيكون كالنادي الصيفي لأحفاد عم شفيق وأحفاد أبي حيث يقضون النهار في شقة عم شفيق يلعبون و يتسلون جميعا تحت إشراف " بسطويسي البواب" الحارس الرسمي لمجموعة الهواليك وتكون الوجبات عند أمي في المطبخ...وفي نهاية اليوم نعمل فصل قوات لكلا الفرقتين كلا في شقته ليناموا....

ولتنفيذ هذه الخطة تطلب الأمر من عم شفيق أن يقوم بنقل أثاث صالة منزله كاملا وقام بتخزينه في حجرة الضيوف....وفي جانب من الصالة وضع التلفزيون والالعاب الالكترونية....وجانب آخر تركه خاليا للعب الكورة ....

ولكن مع مرور الوقت اكتشف عم شفيق حقيقة مفزعة...أنه أخذ بومبة على رأي "أبو الليف".... فأحفاده تغيرت طباعهم بعد أن أشتري أبوهم لكل واحد منهم جهاز "أي باد" فتحولوا من أعضاء دائمين لحزب "دمر ولا يهيمك" إلى أعضاء مانتخين في حزب "أناتيخ التكنولوجيا"... فيمضيان نهارهما كل ملتصق في جهازه لا يتحرك من أمام شاشته.... أما الهواليك الستة: أولادنا.... فحدث ولا حرج لعب وتنطيط .... ولكن مع مرور الوقت وانهار طقم عيالنا بالعب الكمبيوتر الحديثة التي أحضرها أحفاد عم شفيق معهم من أمريكا إنضم أولادنا الستة لأحفاد عم شفيق على الكنبة وأمضوا اياماً هادئة بلا مشاكل ولا شقاوة....

وإلى يومنا هذا لا يزال عم شفيق يستقبلنا كل يوم سبت بجملته المعهودة  
"التتار وصلوا" ولكنها أصبحت مصحوبة بأبتسامة وحلويات .



اصطباحة



- "مامى.....مامى....."

- "أوف.....أصطبحنا...أهو اليوم بان من أوله.....مهى توتا لما تنادي كده  
يبقى في مصيبة...."

وقفت أنظر لنفسي في المرآة وأكملت حديثي مع نفسي:

- "حاجة حلوة أوي....وصل بك الحال أنك تكلي نفسك....؟!آمال  
بقى لما لولا و موما يكبروا و يخشوا سن المراهقة زى أختهم حتعملي  
إيه.....؟؟حتنكشي شعرك و تجري في الشارع ورا عربيات الرش .... ؟؟؟!!  
إيه عربيات الرش دي.....؟؟دي حاجة انقرضت.... سيبك أنت خليك في  
المهم...شكل السلوك حتضرب منك قريب."

وأخذت طريقي لحجرتها وأنا بقدم رجل وأأخر رجل.....ماهو كالعادة أول  
ما ادخل حتقوم مقابلاني ب"وش جبس " حقوقم ردا عليها بكلمتين في  
جنايها ، حتقوم بصالي بصة مش ولا بود ، حقوقم جيباها من كنبوشتها ،  
لحظات والإتصالات بمجلس الأمن العائلي تبدأ..... ستبدا بجدتها، التي  
هي أمي وهوبا الأقي الترابيزة مقلوبة عليا...إزاي أضايق أول فرحة واجيها  
من كنبوشتها...

- "يا ست الكل إهدي.....يا غالية أعصابك.....دا حصل مونتاچ في  
الحكاية، أنا سمعاها بتحكى لك من الآخر للأول....بدأت بالكنبوشة و  
خلصت بالوش الجبس...."

- "يا شيخة حرام عليكي البنت.....مش كفاية عليها ضغط المرحلة ....  
حتبقي إنت وهور مونتها....إزاي وإزاي تجيها من كنبوشتها.... انت عمرك  
اتجيتي من كنبوشتك أنتى ولا أختك ولا عمرنا مدينا إيدينا عليكم....؟؟؟"

- "يا أمي أنا عارفة ، بس هي اللي بقت مستفزة وقليلة الأدب...."

ثم حكيت لها الحكاية من أول ماما لحد الكنبوشة."

وهنا تبدأ مرحلة التعاطف التي تبدأ برينا معاكي وبعدين نخش على  
وصلة اللوم وأنا مش قلت لك من زمان غيري أسلوبك مع البنات.....  
وبعدين الجملة "الفيئالي" قريتي المكتوب في الأهرام النهارده عن تربية  
البنات في سن المراهقة وكيفية التعامل السليم معهم....  
وبعد انتهاء المكاملة الأولى نخش على المعركة الثانية.....زوجي العزيز الذي  
دوما يستيقظ يوم أجازته على نداء الكشافة الخاص بمنزلنا:  
"ماما .....".

وبعدين جملته المعتادة:

- "كبري عقلك وأشتري دماغك... كأنك مش سمعها....."

- "إزاي يعني.....؟؟ أعمل فيها طرشة مثلا.....؟؟ طب الجيران ذنهم إيه.....؟؟؟  
نوزع عليهم سدادات ودان مثلاً.....!!!"

وصلت لباب حجرتها وأنا أرى السيناريو السابق يجري أمام عيني،  
وضعت يدي على مقبض الباب وأنا متوقعة كالعادة تسونامي في  
أستقبالي.....ولكن حدث ما لم يكن على البال.....أبتسامة واسعة في  
أنتظاري مصحوبة بحضن مريب....

- "توتا إنت عيانة يا حبيبتي.....؟ مالك يا روجي طمنييني.....؟"

- "يا مامي أنا زي الفل.....أشمعني بتسألني...؟؟؟"

- "أصلي بصراحة مش متعودة منك على الإبتسامة و خصوصا  
الصباحية.....دي آخر مرة ضحكتي فيها على الصبح كده كان يدوب  
عندك ست شهور....و بعدها عينك ما تشوف إلا النور....كلضمة و  
تكشير و البوز المتين....."

- "يا مامي إنسي...أحنا في مرحلة جديدة....مرحلة السعادة والفرفشة....  
الصداقة والحب..."



ولكن في حاحه مهممة لازم تعرفيها .... إنه من الضروري كما أقول لك دوماً  
أختيار الوقت المناسب والطريقة الصحيحة لطلباتك ولكن بطبيعتك،  
يعني متلبسيش جلد مش جلدك ولا تستخدمي أسلوب مش أسلوبك  
عشان توصلي اللي انتي عاوزاه....”.

تيتي ستارز



لسه ملحقش عم دياب يدخل شنطنا من باب الشقة إلا و حبايب قلبي  
التلاته نطوا لي زي فرقع لوز:

- "حنعمل لنا إيه النهارده يا مامى؟"

- "حاملكم بامية يا كتاكيتي الحلوين" هكذا أجبتهم وأنا أخفي أبتسامتي

- "يا مامى بجد حنعمل إيه النهاردا ما تيجي نروح السينما ولا النادي

ولا....؟"

- "إيه إيه بشويش شويه دا أنتم لسه مبقلكمش نص ساعة في البيت و

بتخططوا للنهارده كأنه آخريوم في الإجازة."

وكالعادة تبرعت توتا بالدفاع المستميت عن حقها هي و أخواتها في

الاستمتاع بكل لحظة في أجازة آخر العام:

- "يا مامى دي أجازة بتيجي بعد طحنة سنة كاملة من المذاكرة"

- "طحنه في المذاكرة؟! فكروني كده أحسن شكلي نسيت!!!! مين فيكم

أنتم الاتنين اللي بتتطحن مذاكرة، لولا اللي خلت الأستاذ إبراهيم مدرس

العربي ينزل يبوس الأسفلت تحت بيتنا بعد آخر درس ليلة الأمتحان

ولا أنتي يا ست توتا اللي الجيران حفظوا أسطوانة المذاكرة المعهودة :

ذاكري يا توتا....أقفلني الكمبيوتر يا توتا....بطلي رغي في التلفون يا توتا....

ها أكمل ولا كفاية؟؟"

وفي العادة تنتهى المناقشة عند هذه النقطة ولكن هذه المرة لم تنته

المناقشة:

- "يا مامى حرام عليكى ده كل أصحابنا لسه في الساحل لحد دلوقتي"

- "إلى يسمعك يا توتا وانت بتقولي الكلام ده يقول إنك راجعة من

أشغال شاقة يا ولداه مش من مارينا!!!!"

تدخلت لولا بجملة اعتراضية سريعة في محاولة لكسب ود توتا:

- "طيب وفيها إيه يا مامي لما نخرج واحنا لسه راجعين من السفر" ولكن موما ردت وهي تربت على كتفي في حنان كأنها أمي لا أبنتي.

- "يا ساتر عليكم متعصبوش مامي وسيبوها في حالها حرام عليكم"

- "ماشي يا ست سوسا.... روجي بقى ساعدي مامي في فك الشنط عقبال ما نشوف أنا ولولا المسلسل التركي...."

جملة من توتا وضحكة شماته من لولا أوصلت الدموع لعين موما على الفور، ولكني كعادتي تداركت العاصفة قبل أن تبدأ...

"ولا تركي ولا هندي.... يلا يا فالحة انتي وهي كلنا حنساعد بعض في فك الشنط... قال سينما قال!!!!!!"

وكعادة توتا تحفتني بسؤال مفاجيء وفي الصميم:

"طيب ممكن يا مامي يا حبيبي نروح معاكي السوبرماركت ؟ أنا سمعتك في العربية وأنتي بتكلمي نانا وبتقوليلها إنك لازم تنزلي النهارده السوبرماركت اللي في سيتي ستارز عشان عامل عروض كويسة والبيت محتاج طلبات كتير..."

دقائق وكان الخبر أنتشر ووجدت لولا وموما يقفزون من الفرحة ويسارعون بتقبيلي لفرحتهم أني سأخذهم معي السوبر ماركت اللي في تيتي ستار كما كانت تسميه لولا وهي صغيرة.

طلبت منهم مهلة لأفكر ووعدتهم إذا فكوا شنطهم على الفور ورضوا الهدوم في الدواليب بنظام سأخذهم معي، وبالطبع أنا وضعت هذا الشرط المجحف من وجهه نظرهم لأنني عارفه عيالي، آل يرضوا هدومهم في الدواليب آل؟؟؟، دول لما بيفتحوا دولا ولا درج لا يمكن يقفلوه، فما بالك بفك شنط سفر ورضها في الدواليب؟! وبينما كنت أرض ملابسي في الدولا ب أخذت اقلب الموضوع في رأسي:

يعني يا ربي أنا أصلا عمري ما كان بيبي و بين أي مول عمار وخصوصا وبالأخص وخصيصا لو معايا عصافير الجنة ، حبايب قلب أمهم، دي مبتبقاش خروجه ، دي بتبقى عملية فدائية أقوم بها و بعدها أتكوم لى يومين في السرير“

فأنا بطبعي ليس لدي خلق على اللف الكثير، أحب أخش المحل، أختار اللي عاوزاه و أذفع و أخرج... ولذا بنيت أمالي على فشل البنات في المهمة التي وكلتهم بها، ولكن ساعتين ولخيبة أمني وجدت ثلاثهم يقفون أمامي يتسمون خلاص يا مامي كله تمام، ولصدمتي وأنا أكشف على الدواليب والأدراج، كله تمام وفي مكانه وبمنتهى النظام وهنا كان لازم أفي بوعدي.... وصلنا سيي ستارز وأنا حاطه أيدي على قلبي فأخر مرة جئت هنا مع أختي و أولادها تم طردنا بالذوق من نصف محلات المول وقام العيال بالواجب في باقي من المحلات واتعجب كيف بعد هذا اليوم لم نوضع في القائمة السودا لزوار سيي ستارز...

ولكن أعمل إيه كانت العروض هذه المرة في السوبرماركت لا تفوت وكان شرطي الوحيد للبنات إننا حندخل السوبرماركت فقط ولن نلف في المول....وفي السوبرماركت سنمشي كلنا مع بعض ولن ننفصل عشان منتوهش من بعض....وبنظراتهم الملائكية التي أقلق منها أخذت منهم الموافقة على شرطي...وبدأنا رحلة التسوق وفي لحظات وجدت شرطي ذهبت أدراج الريح...

توتا تجرنا جميعا على قسم مستحضرات التجميل بينما لولا كانت عماله تفرك عشان نروح قسم اللعب وبالطبع كان كل أمل موما أنها توصل لقسم الحلويات...ووجدت نفسي مشتتة بين طلبات البنات وبين طلبات المنزل الضرورية والتي ضربت هذا المشوار من أجل أن أشتريها....وحاولت

أفكرهم بشروطي وأهددهم بالأنسحاب فورا من السوبرماركت ولكنهم كان يعرفوني جيدا ويعرفون أنني لا يمكن بعد أن ضربت هذا المشوار حارج طرزان من غير ما أشتري حاجة....

المهم عصرت على نفسي ليمونة ووضعت قواعد جديدة...حشترتي طلبات البيت أولا وبعدين كل واحدة فيكم لها ربع ساعة نشترتي فيها ما تريده....وطبعأ أنشرحت أسارهم بهذا الاتفاق الذي سيتيح لهم البرم في السوبرماركت براحتهم....وبدأت في إحضار طلبات البيت بين أفافات البنات....توتا تبرطم أن رجلها وجعتها....ولولا حتفطس وتنام.....وموما بدأت تزن "جعانه يا مامي"...ورق قلبي لحالهم وحدثت نفسي أنهم أكيد تعبانين بعد اليوم الطويل ده...وهوب هوب هوب في حركات لولبية لميت ما يحتاجه البيت في عشر دقائق كأني في سباق....وما أن أنهيت ونظرت للبنات "نروح النهارده يا حبايى وأجيبكم يوم تاني تكونوا فيه مش تعبانين...."ولسه مكملتش الجملة إلا وبقدرة قادر لقيت اللي رجلها وجعاها خفت واللي عايزه تنام فاقت واللي بتزن من الجوع الضحكة ملت وشها...صحيح (الغرض مرض) قلتها لهم وأحنا بنلف ما بين قسم التجميل وقسم اللعب وقسم الحلويات ودي تجيب حاجه ودي تشد حاجة وتوقع الرف كله ، أما موما فربعت داخل عربة السوبرماركت وقعدت في الخباثة تأكل الحلويات التي أحضرتها....وأمتدت الربع ساعة اللي سمحت بيها لكل واحدة لنص ساعة ،يعني بحسبة بسيطة نص ساعة في تلاته يساوي ساعة ونص من العذاب و الجري من قسم لقسم...نصف ساعة من المناقشات:

"عاوزه دي يمامي"

"لأ يا حبيبي مينفعش دي غاليه أوي"

”لأ مينفعش اللون دا غامق على سنك“

”لأ عندنا من اللعبة دي كتير..“

”لأ لأ... بعد إذنك يا مامي بالطريقة دا عقاب مش فسحة...“

”عقاب يا مفتريين...دا العربية بتاعتنا مليانه على آخرها...عموما دي

غلطتي مش غلطتكم...يلا بينا على البيت كفاية على كده النهارده...“

وبعد مشاورات عدة ومحاولات لإقناعي إنه لسه بدري وصلنا أخيرا

للكاشير وبدأنا في وضع المشتريات على تراييزة الكاشير ولسه حنخش في

ماتش تاني مين يحط حاجته قبل الثاني عندما رن موبايلي :

-”أيوه يا حبييتي هو أنتم فين...“

-”مش أنا قلت لك إننا رايحين السوبرماركت يا حبيبي...“

-”السوبرماركت؟؟؟؟غريبة...!!!! هو فيه حد يروح السوبرماركت من غير

ما ياخذ معاه المحفظة....ههههههههه“

المحفظة...يا خبر أبيض ده أنا تقريبا نسيتهما على الكومودينومن اللهوجة

بتاعة البنات...

واللي يشوف نظرات البؤس والكأبة على وجه البنات وهم يتركوا

غنائمهم التي أختاروها حته حته من السوبرماركت يقول أنهم واخدين

علقة سخنة...ولم تكن مشكلتي الوحيدة هي شرح هذا الموقف المرحج

لعامل الكاشير المسكين الذي سيعمل مرتجع لكل شيء ضربه ولا للعامل

الذي عبأ كل شيء في أكياس ولكن كبرى مشاكلي كانت الحلويات التي

قرقضتهم موما...ووقفنا أنا والبنات في نص هدومنا نلم كل الفكه من

شنتنا شلنات في برايز لحد ما جمعنا مبلغ الشكولاته المأكولة...أي

نعم إربع جنيهات في أنصاص جنيهات ولكنهم قضوا الغرض وخرجنا من

السوبرماركت وأحنا نجر أذيال الخيبة وطبعا قلت توبة إن كنت أغير

مبادئ ابداء.....توبة أن حطيت رجلي في تيتي ستارز ولا غير تيتي  
ستارز بالعيال تاني...

الحقنة العملاقة



طول عمري وأنا أكبر مشاكل حياتي هي الحقنة سواء حقنة فيتامينات أو حقنة تخدير عند طبيب الأسنان أو حتى سحب عينة بسيطة من دمي لتحليلها... حتى دبابيس الخياطة ، كانت رؤيتها في يد الخياطة وهي تظبط بها الملابس علي يسبب لي أزمة حادة...

حتى كان اليوم الذي ذهبت فيه لولادة ابنتي الكبيرة توتا وكانت ولادة قيصرية...وعينيكم ماتشوف إلا النور...أنا شفت الممرضة داخله علي بحقنة و بما يسمى الكانولا إلا وجاءت لي حالة هستيرية من الصراخ وقمت أجري في أودة المستشفى وبطني قدامي مترين والممرضة وأمي وزوجي وخالتي يجرون ورائي يهدئون من روعي ويحاولون إقناعي إنها شكة خفيفة وأنا اقول لهم شكة خفيفة إيه؟ أنتم مش شايقين الحقنة كبيرة أوي ازاي...وأستمر الحال هكذا أنا ألف وهما وراي لحد ما تعبت وأستسلمت...

ويومها أفقت من البنج على صوت زوجي وأمي يتناقشان ،زوجي مصمم أن خوفا من الحقن ليس خوف ولكنه دلع ماسخ وأمي تحاول إفهامه إنها طبيعتي ولا يشوبها ذرة دلع

“وبعدين يا ابني الناس كلها بتخاف من الحقن مش أزمة...”

مش أزمة أيه يا حماتي دي فرجت علينا المستشفى..

المهم في هذا اليوم صممت أن تكون هذه أخر حلقاتي مع فوبيا الحقن... مش شجاعة ولا مجدعة إنما كانت نوع من التضحيات التي يجب على الأم أن تقوم بها من أجل ابنائها....مهو مش معقولة ابقى شحطة طويلة عريضة واقعد أجري من حقنة صغنونة أمام أبنائي ، فأى قدوة سأكون ساعتها...؟

ولكن للأسف ليس كل ما يتمناه المرء يدركه ، فبالرغم من محاولاتي

العديده لأعمل فيها سبع الليل أمام بناتي في موضوع الحقن ده إلا أن من الواضح أن موضوع الحقن كان أمرورائي يجري في الدم... وكانت مشكلتي مع لولا وموما بسيطة عندما نذهب للموعد الدوري للتطعيمات ، كان الموضوع يخلص بشخطين على نظرة وعيد وتهديد مع إغراء بالدوناتس المفضل عندهم كان يأتي بالنتيجة المرجوة و نأخذ التطعيم، أينعم متضررين ولكن كنا نأخذه وخلص ، الحمد لله ، مهو مش معقولة حأنضرب في عيالي التلاته....فكفاية علي توتا اللي مطلعة عيني من وهي عمرها سنتين عندما بدأت تربط بين زيارتنا للدكتورة وبين حقنة التطعيم فأصبح هذا المشوار جحيم بالنسبة لي ولكن في سنها الصغير المشكلة كانت مقدور عليها، أحملها بين يدي وأثبتها في حضني بمساعدة ماجدة ممرضة الدكتور وكانت تأخذ التطعيم أينعم بطلوع الروح بس كانت تأخذه ولكن عندما كبرت أصبح موضوع حضني وتثبيتها أمر صعب بعد أن قاربت أن تكون طولي...وكان من ضمن النصائح التي نصحتني بها الدكتورة وكنت أعمل بها:

“أوعي يا مدام تخلي لولا وموما يشوفوا أختهم وهي بتطعم احسن يعملوا زيها وديه تبقى مصيبة ووقعت فوق دماغنا....”

ولكن وصف مصيبة لم يكن يكفي لوفعل الثنائي المرح ما تفعله أختهم، فلزلت أتذكر حتى اليوم عامل الصيدلية المسكين الذي ساقه حظه النحس ليأتي لمنزلنا وتوتا عمرها ثلاث سنوات ليعطيها حقن المضاد الحيوي التي كتبتها لها الدكتورة ومرت أول حقنة على خير لأنها لم تتوقعها، فهذه كانت أول حقنة لها في حياتها ، غير حقن التطعيم طبعا والتي تعرف مكان أخذها جيدا في عيادة الدكتورة زينب وبالعكس رحبت مبتسمة بعامل الصيدلية....وكانت هذه آخر مرة يرى فيها هذا المسكين

ابتسامتها... فتاني يوم وما ان رأته وجهه إلا وبدأت في صراخ هستيري وبعد أن قمنا أنا وأبوها بتهدئتها وأخيرا وافقت بشروط أشرتطتها على عامل الصيدلية المسكين لتوافق على أخذ الحقنة :  
- "الأول حنعة لعسرة(عشرة) وبعدين حأخذ الحقنة "

طبعا المسكين عد لعشرة و عشرين ومائة ولا حياة لمن ينادي... تجري في البيت كله تصرخ رافضة الحقنة حتى بعد أن أضطر أبوها أن يأخذ حقنة فيتامين "ب 12 " لتشجيعها ولكن لم ينجح هذا معها ايضا...وفي النهاية اضطررنا أن نستخدم << أسلوب التثبيت >> فأخذتها في حضني و مسكها والدها وأخذت الحقنة الثانية بالعافية....

أما الحقنة الثالثة فكانت كوميدية فوجئنا بالصيدلية تبعث لنا بعامل مختلف...غالبا المسكين بتاع امبارح أعتزل المهنة نهائيا بعد أن سمعته وهو خارج من باب الشقة ببيطرم " إن أكل العيش صعب " أما الضحية الجديدة لحقنة اليوم فلم يأخذ خوانه عندما قالت له توتا شرطها لتأخذ حقنة اليوم: "تعد من واحد لعسرة..." وعندما نفذ وبدأ التجهيز للحقنة قالت "لأأعد من واحد لعسرة بس تقول واحد وتسقف مرة، تقول أتنين و تسقف مرتين وكده لحد عسرة وبعدين حأخذها على طول...." ونفس سيناريو الأمس والذي أنتهى أيضا بالتثبيت وأخذ الحقنة بالعافية....

وفضلنا علي المنوال ده ، كل حقنة بمشكلة لحد ما كبرت وقلت التطعيمات .

وفي يوم من الأيام عملت غلطة عمري...كنا راجعين من مشوار فقلت نروح هيلا بيلا على الدكتورة نأخذ تطعيم الحى الشوكية ونخلص وطبعا توتا كانت معنا ويا ليتي كنت فصلت القوات وعملت زي كل

مرة ، هي في زيارة وأخواتها في زيارة ولكن ساعة القدر بيعى البصر ، قلت  
لنفسى:

“توتا كبرت وأهويبقى مشوار واحد وخلص ، مهي مش معقولة حتصرخ  
وتعيط زي ما كانت صغيرة....”

وياليتها عيطت وصرخت بس ، دي فرجت علينا الشارع و العيادة  
والمناطق المجاورة....هو الجواب كان باين من عنوانه ، أول مادخلنا  
العيادة، سألتني سامية السكرتيرة :” مين اللي لها تطعيم النهارده...” ولم  
ألحق أكمل كلمة “كلهممممممم” إلا ولقيت توتا لبست الوش الجبس  
ودخلنا في مناقشة طويلة عريضة ...

“ تطعيم لأ يا مامي...أنا كبرت خلاص...”

“يا بنتي يهديكي يرضيكي...”

لكن أبداً وكالعادة أستعنت بصديق وهذه المرة كان أبي ،واللي عنده  
مواضيع الصحة وبالطبع التطعيم كان أحد هذه المواضيع مفهماش كلام  
وكالعادة برضه أنتصرت توتا وقالت لي :”كلعي جدو وبيقول لك بلاش  
تطعيم النهارده...” ولم يكن هذا ما قاله لي أبي ولكنه وجد نفسه في حارة  
سد مع توتا ، فرمى الكورة في ملعبي فهودائما رأيه (الجدود للدلع والأباء  
للشدة)، ولكنه أصدر أمره لي:

-”مواضيع الصحة دي مفهماش فصال أتصرفي ولكن لازم تاخذ التطعيم

النهارده....الحى الشوكية مش هزار...”

وكان عملت فيها إني موافقة على تأجيل التطعيم وطلبت مساعدتها  
لي مع أخواتها بالداخل....ولكن في الداخل أكتشفت توتا إنها وقعت في  
كمين؛وأنها ستأخذ التطعيم....وما إن رأت الحقنة إلا وانتابتها حالة  
هستيرية وحاولت أن تخرج من الباب ولكن ماجدة الممرضة كانت تقف

لها بالمرصاد وبعد محاولات عدة ومناوشات وعمليات كروفرف في حجرة الكشف، لمحت نظرة أعرفها جيدا من الدكتورة زينب نظرة "أنا خلاص خلقي ضاق وأتفرقت" وهنا كان لازم أتخذ إجراءات قمعية شديدة مع توتا ونظرت لماجدة الممرضة نظرة فهمتها على الفور بحكم خبرتها مع العيال والحقن، نظرة (حنثبتها)، وهوبا في حركة لولبية قفزت وجلست على حجر توتا (طبعاً مش بكامل وزني) ولكن جلسة خفيفة عشان أثبتها في الكرسي حتى تستطيع ماجدة من تثبيت ذراعها وأعطتها الدكتورة التطعيم في وسط أجواء من الصراخ من توتا ونظرات رعب من لولا وموما، وغضب من الدكتورة، وزغاريد من الممرضة، طبعاً هذا بخلاف العرق الذي كان يتصبب منا جميعاً بعد المجهود الفظيع الذي قمنا به ... وعندما جاء الدور على الثنائي المرح لولا وموما لمحت نظرة خوف وتردد، فأستشفيت أنا والدكتور بواذر أزمة أخرى مع التطعيم وهنا نظرت لي الدكتورة:

- "يا مدام أنا لو منك بلاش نطعم الصغيرين النهارده بعد الصدمة الفظيعة اللي اتعرضولها... حيطلعوا عينينا كفاية علينا توتا النهارده..... هاتهم بكره ولا بعده يكونوا نسوا شوية اللي شافوه.. دا ربنا يستر وباقي العيال اللي مستنيين بره وسمعوا اللي حصل ميعملوش زي الست توتا..."

وهذه الليلة وبعد أن نامت لولا وموما قلت أتكلم مع توتا يمكن أوصل لسبب أزمة الحقن معها ولكنها أعطتني الرد في كلمتين عقدوا لساني :  
"أعمل أيه اصلي بشوف الحقنة كبيرة أوي أوي.... حقنة عملاقة ..."  
أبتسمت وقلت في سري:

"صحيح أكفي القدرة على فومها تطلع البننت لأمها...."



# فلسوفة الغبرة



صغيرتي لولا كانت في الخامسة من عمرها عندما نادى عليّ مساء إحدى الليالي وهمست لي في أذني أنها عاوزة تقولي لي حاجة مهمة أوي، فوعدها أن أتفرغ لها بمجرد أن أنتهي من تحضير شنطة والدها المسافر الليلة للأسكندرية في عمل .

أوصلت زوجي للباب بعد أن قبل البنات مودعاً... وذهبت للست لولا في سريرها لأسمع منها "الحاجة المهمة أوي"، وقفت في سريرها ومالت علي حتى لا تسمع أختها توتا ما ستقوله :

- "إنتي عارفة يا مامي إن فيه رجالة بتقول لمراتها إنها حتسافر الإسكندرية في سُغل(سُغل)وهما في الحقيقة رايعين يتجوزوا واحدة تانية وحيسافروا معاها كمان ..."

ونظرت لي نظرة ذات معنى، كأنها تقول لي فتحي عينيك أحسن يكون بابا ناوي يعمل كده.... نظرت لها مذهولة وأنا أحدث نفسي ما هذا الكلام الكبير بالنسبة لسنها الصغيرة؟ وما هذا التفكير الغريب؟  
وسألتها:

- "عرفتي منين الكلام ده يا حبيبتى...."

- "سفته (شفته) في المسلسل اللي إنتي وتوتا بتشغّلوه بعد الظهر في التلفزيون...."

بما إنني أثق في زوجي ثقة عمياء فلم يترك هذا الكلام أثراً كبيراً في نفسي، وكان مصدر ثقتي فيه أنه دائم الشكوى من الزواج ومسئوليته ومشاكله ، فلم أعتقد أنه ممكن أن يقدم على هذه الخطوة مرة تانية، وبيني وبينكم على رأيه: "اللي بيحرب الجواز مرة يبقى حمار لو عملها تاني" ، والحمد لله إن جوزي ليس بحمار... بس مش عارفه ليه في هذه اللحظة بالذات لعب الفار في عبي ولقيتني بأ تذكر المثل القديم



- "يا بنتي عيشة إيه اللي عيالك عايشينها دي... طول النهار التلفزيون مفتوح في البيت عندكم عمال على بطال وأنا وأنتي عارفين البلاوي اللي بتعرض كل ثانية في التلفزيون...".

- "دول عيال يا أمي مش حيركزوا في اللي بيتفرجوا عليه ، متقلقيش...".  
- "يا بنتي العيال بتلقط أي حاجة ، الواحد يشغلهم كرتون فرنساوي عشان يحسن لهم اللغة ولا أغاني أطفال ، مش المسلسلات والأفلام..."  
وكان ما تطلبه مني أمي حينها مشكلة كبرى، فبالنسبة لي التلفزيون شيء أساسي وهام حتى وإن لم أتفرج عليه، فمجرد وجوده مفتوح وبيزن في ودني كان يريحني، كأنه لمبة السحاري اللي بنولعها للعيال وهما نايمين، وأعتقد أن هذه مشكلة بدأت معي منذ الصغر، منذ أيام التلفزيون الأبيض والأسود، كانت هذه الشاشة المربعة تشدني إليها كالسحر مثل ماجدة في فيلم النداهة، أتذكر وأنا في الثالثة عشرة من عمري ان أكبر همومي كان مسلسل أجنبي اسمه " دالاس"، كان موعد عرضه في التاسعة والنصف مساءً وكان هذا هونفس موعد نومي، فكنت أستغل أي فرصة لأخرج من حجرتي عسى أن يشفق علي أبي وأمي ويسمحوا لي بمشاهدة ولو خمس دقائق من دالاس أمل حياتي ، ولكن هيات، فوقت النوم في منزلنا كان مقدساً وخصوصاً لو في مدرسة ثاني يوم، وعندما ظهر إختراع العصر، الفيديو، كانت سعادتني لا توصف بالرغم من أن استخدامه كان عليه قيود أيضاً ولكن كان شيئاً مريحاً بالنسبة لي وجود الجهاز والشريط اللي نفسي أشاهده تحت يدي في أي وقت .

واستمرت " مندوهة" هكذا بأي شاشة مفتوحة أمامي حتى كانت هذه الليلة اللي تحفتني فيها فيلسوفة الغبرة بهذا التحذير....وحينها أخذت قراراً لرجعة فيه: " يا بنات من هنا ورايح مفيش فرجه على التلفزيون

بتاتاً بتيتا إلا على الكرتون بس .”

وقلت في بالي إنقاذ ما يمكن إنقاذه ولما يبقى نفسهم يتفرجوا على أفلام اخدهم السينما، وأهي تبقى 1×2، خروجة وفرجة في نفس الوقت، ولم تقابلني مشكلة كل أم، دوشة العيال وشقاوتهم في السينما وبما إن عيالي متعودين إن أي شاشة بتتفتح قدامهم “النداهة” بتندهم على طول زي مامتهم، فكانوا يقعدوا “هس هس” يتفرجوا بمنتهى الهدوء وميطلعهمش صوت لغاية ما تنزل كلمة النهاية، ولالحق كان الفشار والحلويات عامل مساعد في تحقيق هذا الهدوء .

ولكن ككل شيء جميل له نهاية ، إنتهت قعدة الهس هس بتاعت السينما على يد الأخت موما اللي كانت يادوب سنة وكام شهر....

ففي أحد خروجاتنا للسينما وبعد إن جهزنا ويا دوبك وصلنا لباب الشقة وإلا لقطتنا موما التي كنت أحرص أن تكون في حجرها مع أم إبراهيم حتى لا تبكي وتشبط فينا، ولكن في هذا اليوم سبق السيف العزل وفي لحظات كانت تقف على الباب وهي تحمل في يدها شنطتها الصغيرة، وطبعاً صعبت علينا وهي تنظرلنا ببراءة وتمد يديها وتقول لنا: “أوبا ... أوبا...”، وقررت أن أجازف وأخذها معانا :

“يعني حيحصل إيه ، وعموما ميعاد نومة بعد الظهر قربت فمفيش مشكلة”، وفعلاً عقبال ماوصلنا كانت في سبات عميق ويادوبك بدأ الفليم يحلوّ والأكشين حبيتي إلا والست موما صحيت، وضربت بعينها حولها كله ضلمة ولسه البطل حينقذ البطلة من وسط الأشرار، إلا والسرينة أفتحت :

“يا موما يهديكي يرضيكي...يا بنتي أنا مامي...بس يا حبيبي، توتا ولولا هنا جنبك أهمه...”، أبدأ لم تسكت بل وبدأت في وصلة من الصراخ

الهستيري مصاحب له أفافات وهش هش من كل من في السينما ولكن  
أبدأ لم تسكت حتى توقف الفيلم وأضيئت الأنوار في القاعة .  
وكما قال لي مدير السينما عابساً ونحن في طريقنا للخارج إن هذه أول  
مرة في تاريخ هذه السينما أن يأخذ فيلم أستراحتين في منتصفه وكان  
هذا آخر عهدنا بالسينمات ورجعنا لقواعدنا سالمين غانمين... التلفزيون  
مفتوح 24 ساعة و البنات بيتفرجوا عادي وأنا أصبحت رجلي على رجل  
جوزي في أي رحلة عمل خارج حدود محافظة الجيزة....



## الفهرس

- \* قبل الإهداء والذي منه ..... 5
- \* إهداء صغنووووون ..... 7
- \* إهداء كبير أووووووووى ..... 9
- \* إهداء خاص جداااااااااا ..... 11
- \* إهداء أخيرررررر ..... 13
- \* إهداء الطبعة الجديدة ..... 15
- \* من طأطأ ..... لسلاموا عليكم ..... 17
- في بيتنا فأر ..... 21
- الست سميرة النمامة ..... 27
- موقعة الملوخية ..... 35
- عمو الصّلاح ..... 41
- يا مطرة رخي رخي ..... 47
- الست الطيبة بتاعت السنان ..... 53
- الساعة سبعة ..... 59
- جلسة مصارحة ..... 65
- الخطة ..... 71
- الكابوس ..... 77
- أنا الي جبت ده كله لنفسى ..... 83
- فستان الحفلة ..... 91
- عك دوت كوم ..... 97
- من خرج من داره أتقل مقداره ..... 103
- يا فرحة ما تمت ..... 109
- عم شفيق المسكين ..... 115
- أصطبأحة ..... 123
- تيتي ستارز ..... 129
- الحقنة العملاقة ..... 137
- فيلسوفة الغبرة ..... 145

للتواصل مع الكاتبة «ريم مراد» :  
rimmrd@yahoo.com

بيدج الكتاب على الفيس بوك :  
<https://www.facebook.com/Yawemeyat.Ome.tale3.hababi.3niha>

في **كيان للنشر والتوزيع**، هدفنا نشر كل إنتاج إبداعي، جودته عالية، وأفكاره أصيلة، في مختلف مجالات الأدب والسياسة والصحافة والفن، باللغة العربية والإنجليزية. نهتم بالمواهب، ونرعاها، ونتيح لها فرصة الوصول للقارئ العربي، مع مراعاة أفضل معايير الجودة والاحترافية في النشر.

رسالتنا في كيان، تشجيع حب القراءة والكتابة في مصر وعالمنا العربي، وتطوير مهارات الإبداع، وتعزيز ثقافة التميز والابتكار. كُتابنا موهوبون، متمرسون، مصريون، ومن جميع أنحاء الوطن العربي، وإصداراتنا متنوعة، متميزة، مختلفة. دائماً نرحب بالكتاب الشباب، والمواهب الجديدة، ونعطي فرصة متساوية للجميع؛ لأن مرادنا هو الارتقاء بفنون الأدب العربي ككل، والوصول بالإنتاجات الإبداعية العربية إلى العالمية.

لو **تحب تراسلنا**، لو عندك استفسار، لو حابب ترسل لنا إنتاجك الأدبي، سواء كان رواية، أو شعر، أو مقال، باللغة العربية أو الإنجليزية، ما ترددش. إبعث لنا على:

**kayanpub@gmail.com**

**info@kayanpublishing.com**

أو زور موقعنا:

**www.kayanpublishing.com**

وللاتصال الهاتفي:

هاتف أرضي: **0235611772 - 0235688678**

هاتف محمول: **01000405450 / 01005248794 / 01001872290**

ويمكنك التواصل معنا إلكترونياً على الروابط التالية، للاطلاع على كُتابنا، ومتابعة إصداراتنا الجديدة، وأنشطتنا وأنشطة كُتابنا الثقافية:



Kayan.publishing



kayan\_publishing



Kayanpublishing



kayanpublishing



+KayanPublishing



KayanPublishing